



0718^m

武林掌故叢編目錄

第五集

西湖百詠二卷

宋董嗣杲撰 明陳贄

客杭日記一卷

元郭昇撰

西湖八社詩帖一卷

明不著編輯姓氏

湖山敘游一卷

明劉暹撰

養素園詩四卷

國朝王德溥編

元妙觀志四卷

國朝道士仰蘅撰

西泠仙詠三卷

國朝陳文述撰

北隅掌錄二卷

國朝黃士珣撰

武林掌故叢編 第五集

西湖雜詩一卷

國朝蔣坦撰

揚清祠志一卷

國朝丁午撰

西湖遊覽記四卷

湖山敘游一卷

西湖百詠一卷

客杭日記一卷

西湖八社詩帖一卷

湖山敘游一卷

第五集

武林掌故叢編目錄



宋董嗣杲撰明陳贄和韻

西湖百詠

楊文瑩署檢

光緒七

年夏六

月錢塘

丁氏刊

于於越

重刊西湖百詠詩序

予嘗敬閱大明一統志見西湖爲浙江錢唐之勝概
今古之美觀也不得如仕者商者緇羽者率無勢分
之限而得往觀焉近得天順間會稽陳太常少卿贊
所和宋季董嗣杲百詠讀之知其風景不虛此心飄
然已在西湖之上矣且逐景述其實董倡居前陳和
居次景凡九十有六詩共一百九十有二謂之百詠
者蓋亦極言之耳夫謝安之東山醉翁之滁山東坡
之赤壁是皆隨地取樂寓情於物而流譽於今者也
自分奉藩中州而境內山川形勝皆在二三百里外

西湖百詠序

一

尙不能一遂登陟遊覽亦如三君子之流譽耳何難
於西湖之往觀邪故於是編感寓吾情自不能已用
是翻刻流布俾四方好事如予之不能往者可以卽
詩知景宛然在目所謂不出門庭觀盡江山者是已
其旣往者亦將以是編爲實錄而憶其勝矣甯不啟
其好樂之同情哉大明嘉靖丁酉春辛巳之吉周藩
南陵玉雲樓子書并序

今古之美觀也
不勝枚舉
香翰香齋
卷之四
重刊西湖百詠詩序

西湖百詠倡和詩序

太常少卿會稽陳惟成先生博學多才尤長於詩其
致政而歸也樂錢唐山川之勝日與名公碩彥往來
西湖之上朝則聯輿而出暮則並舟以還或挈榼攜
壺尋幽逐勝或輕橈短棹夷猶清波吾不知視昔人
之扁舟五湖鑑湖一曲者其興爲何如也因得宋季
董靜傳先生西湖百詠讀之而有契於心乃卽其所
詠之景隨韻和之亦得百首眞所謂隨珠卞璧輝耀
後先而於西湖之山水若增而高若闢而廣者也好
事者聞之爭相傳誦時太監盧公奉上命鎮撫兩浙

西湖百詠序

二

尤敦尙儒雅聞先生之有是作也取一帙置几席間
朝夕諷誦之或因公暇出遊湖上於世俗紛華綺靡
之音一切屏去弗用惟命二童子左右立歌是詩以
侑酒遇會意處輒撫掌大笑以爲樂又以爲獨樂其
樂曷若與人同其樂乃命工刻梓以廣其傳且謂僕
與先生相好也俾敘以弁其端僕固辭不獲乃復於
公曰江南山川以錢唐爲勝而西湖又錢唐之勝處
也錢唐之士生於斯長於斯其朝夕還而徘徊瞻
眺於是者蓋未可以一二計也然詢其西湖之景則
多者識其數十少者道其二三而已求其能得是百

景之全者蓋鮮也今得是集而觀之卽其地而得其景因其景而詠其詩則雖不暇遍歷而西湖之勝已在目中矣其有資於遊觀之樂不旣多乎且非獨錢唐之士爲然也雖士之處遐陬僻壤者亦將曰吾聞錢唐西湖之勝久矣惜未得資糧貫屨以往觀其勝也今觀是詩蓋不待資糧貫屨而西湖之勝已若親歷而目睹之矣不亦快哉是則西湖之勝因二先生之詩而益顯二先生之詩得盧公之刻而益傳殆將與王摩詰輞川雜詠朱晦菴詠武夷九曲及近時高季廸姑蘇百詠竝垂不朽矣不亦偉與若夫二先生用意之精深措詞之工雅則讀者當自得之茲不暇細論也天順七年癸未歲夏五月望日賜同進士出身中憲大夫南康府知府致仕錢唐陳敏政序

西湖百詠序

重刻西湖百詠詩序

孔子謂詩可以興可以觀可以羣可以怨多識於鳥獸草木之名作詩者不出此不足以爲教讀詩者不知此不足以爲學然善作者言多隱約微婉非因辭逆志體事得情茫然聲韻之末終無以達其本旨宋錢塘董嗣杲西湖百詠繼而和之者今陳太常惟誠亦旣梓行矣其鄉人朱彥明尤慮其未廣將翻刻遠布持以求序念自秦漢不至唐宋西湖形勝日以著聞林泉巖洞坡堤峯嶺祠廟園池樓閣橋亭井墓之屬莫不各有標題詠玩其間國謀人事之興亡善惡

西湖百詠序

四

是非得失因是詩亦足興起考見後世周行歷覽延納韋素莫甚於白樂天蘇文忠而興利救弊未嘗曠廢表忠觀未立錢氏遺黎過故陵寢輒相與垂泣終無一人反側岳忠武銜冤就獄至死無片語濫譏詩所詠載幾於和而不流怨而不怒致養如聚景園追遠如延祥觀死難如張忠勇廟可以同光棲霞嶺墓事父事君詩亦具備而其緒餘多識又足以通知古今曉暢名物按求遺跡於荒蕪迷佚之中不使終泯夫然後嗣杲惟誠之言庶幾合乎聖人之教讀者尙亦逆志得情毋徒留連景光韻想形勝以小視彥明

之舉則此集可以史稱矣海鹽靖之張寧序



西湖百詠序

五

名譽西泠集何以史稱矣海鹽靖之張寧序

西湖百詠序

錢塘西湖爲東南偉觀窮騷人墨客技不得一元祐
間楊郭二子皆以百絕唱乃無嗣音者兩山仙佛盤
錯坡老守郡時遊歷幾徧遺跡尙可考南渡後貴臣
邸第多在亭館日闢視前此復不侔蓋富盛極矣予
長茲地與山水爲忘年交凡足跡所到命爲題賦以
唐律幾三十餘年僅逮百首然皆目得意寓敘實鋪
寫非但如楊郭二子披圖按志想像高唐而已搜索
奇勝難徧以數舉此直據予所見不以誇奇鬪勝爲
工也薄宦於雲公事簡輒是正完恐故老傳說誠僞
不一將有以蝦蟆方言指下馬陵者或將笑之子狀
景物耳不暇恤歲月無情陵谷易變將使百千年後
登覽降望於西湖上者因詩有感焉咸淳壬申臘月
靜傳居士董嗣杲書於餘英堂

西湖百詠序

六

西湖百詠序
錢塘西湖爲東南偉觀窮騷人墨客技不得一元祐
間楊郭二子皆以百絕唱乃無嗣音者兩山仙佛盤
錯坡老守郡時遊歷幾徧遺跡尙可考南渡後貴臣
邸第多在亭館日闢視前此復不侔蓋富盛極矣予
長茲地與山水爲忘年交凡足跡所到命爲題賦以
唐律幾三十餘年僅逮百首然皆目得意寓敘實鋪
寫非但如楊郭二子披圖按志想像高唐而已搜索
奇勝難徧以數舉此直據予所見不以誇奇鬪勝爲
工也薄宦於雲公事簡輒是正完恐故老傳說誠僞
不一將有以蝦蟆方言指下馬陵者或將笑之子狀
景物耳不暇恤歲月無情陵谷易變將使百千年後
登覽降望於西湖上者因詩有感焉咸淳壬申臘月
靜傳居士董嗣杲書於餘英堂

欽定四庫全書總目

西湖百詠二卷

宋董嗣杲撰附明陳贄和韻據西湖志嗣杲杲季入道孤山四聖觀改名思學字無益此集當作於是時贄字維成餘姚人徙於錢塘洪武間以薦授杭州學訓導後官太常寺卿其和嗣杲此集亦當在居錢塘時西湖志稱嗣杲原唱及贄所和皆九十六首天順癸未始以二家所作合刻又稱董倡居前陳和居後仍各九十六首共一百九十二首謂之百詠者蓋亦極言之耳

西湖百詠總目

一

云云此本上卷四十九題下卷五十一題實各足百詠之數與西湖志所記不符鮑廷博稱疑周藩翻雕之時其底本偶有脫頁未及深攷遂以爲原缺四首然其詩皆七言律體每題之下各註其始末甚詳頗有宋末軼聞爲諸書所未載者嗣杲詩格頗工整贄所和才力稍弱亦足肩隨皆迥在許向華亭百詠之上也

西湖百詠目錄

卷上

豐樂樓

湧金池

環碧園

玉蓮堂

玉壺園

先得樓

古柳林

雲洞園

霍山祠

湧泉

東西馬塍

石函橋

孤山路

德生堂

總宜園

斷橋

西湖百詠目錄

大佛頭

葛嶺

保叔塔

巾子山

水月園

水仙廟

寒泉

參寥泉

葛公雙井

江湖偉觀

此君軒

杯泉

初陽臺

孤山

和靖先生墓

陳朝柏

瑪瑙坡

金沙井

六一泉

西林橋

鳥巢

樂天竹閣

岳鄂王墓

妙智菴洞

九里松

玉泉

鮑家田

忠勇廟

廣軍教場墓

靈隱天竺寺門

合澗橋

北高峯

韜光菴

卷下

石筍峯

西溪

飛來峯

冷泉亭

西湖百詠目錄

二

呼猿洞

龍泓洞

理公岳

香林

翻經臺

重榮檜

煉丹井

跳珠軒

曲水亭

天竺觀音

風篁嶺

龍井

辨才塔

梅坡園

長耳相

玉岑

南高峯

煙霞洞

石佛菴

水樂洞

楊梅鳴

石屋

眞珠泉

虎跑泉

南屏山

蘇公隄

先賢祠

西湖道院

湖山堂

三賢祠

雪江講堂

崇眞道堂

小新隄

翠芳園

甘園

雷峯

勝景園

長橋

劉妃墓

慈雲嶺

西湖百詠目錄

三

包家山

登雲臺

五丈觀音

表忠觀

聚景園

崔府君廟

依光堂

余先得影寫周藩本有南陵玉雲樓于南康知府陳敏政兩序詩僅九十六題疑未慊也今從 文瀾閣遺書傳鈔是帙百詠獨全鮑以文謂終當覓元刻及周藩翻本對勘方得釋疑余雖未獲元刻差喜得釋鮑疑書貴兼收豈不信哉因付手民以延湖上掌故董靜傳居清河坊陳惟成寓昭慶灣陳志行居鹽橋東又武林之掌故也光緒辛巳端午錢塘丁丙識

西湖百詠跋

西湖百詠卷上

靜傳居士董嗣杲明德

餘姚後學陳 贊惟成和

豐樂樓

在湧金門外舊爲豐豫門政和七年於湖

堂右以衆樂亭舊基建樓扁聳翠建炎後

改今名乾淳間設法酤酒繼有撓政者罷

之淳祐九年改建官爲扁鑰城之西有四

門曰錢湖曰清波曰錢唐出此三門皆不

見湖獨湧金門正與湖水相對建樓掩之

西湖百詠卷上

關閉風水古傳樓未建時山水或漂城居

鶯花簫鼓綺羅叢人在熙和境界中海寓三登歌化

日湖山一覽醉春風水搖層棟青紅溼雲瑣危梯粉

黛空千里掌平都掩盡有誰曾紀建樓功

萬條垂柳百花叢樓外湖山一望中人醉三春羅

綺月簾開四季管絃風當時傑構基猶在昔日繁

華事已空惆悵文山生恨晚虞淵取日竟無功

湧金池

在湧金門裏錢氏書三字刻石其傍云清

泰三年丙申之歲建午之月特開此池楊

蟠詩云湧金春色晚吹落碧桃花一片何
人得流經十萬家

一道香溝壓郭西粉牆低護石階危短碑數尺鐫何
字清泰三年鑿此池橋市浣衣無空處廟門賣卜有
靈時碧桃自趁東流水暗老春光水不知

大泓碧甃郭門西砌石年深覺半危長見莓苔封
斷碣暗添湖水滿方池魚吞片片花浮處人玩娟
娟娟月印時昔日楊蟠詩句好只畱何字與人知

詩合韻環碧園

在豐樂樓北柳洲之側恭聖仁烈楊太后

西湖百詠卷上

二

宅園

繞舍晴波聚釣仙五龍池畔柳洲前清虛不類侯家
屋輪奐曾資母后錢三面軒窗秋水觀四時簫鼓夕
陽船攬將山北山南翠獨有黃昏得景全

來游此境似神仙綠水青山遶檻前盛飾名園隣
寶地豈論內帑費金錢輪蹄日日看花侶絲竹時
時載酒船湖上平章眞誤國可憐斯圃亦難全

一 道香玉蓮池

在湧金門城北舊在郡治教場之南堂瞰
竹園山下池水瀉祐九年與竹山閣同建

景定二年移建於此扁一清繼以堂外多
種白蓮復換揭玉蓮舊賜扁

仙根曾就華峰移淨引湘波出浴妃龍護先皇三字
在燕居舊尹一清非風簷搖影涼姿媚月檻迷香冷
豔肥平展水天菱唱遠竹山蒼翠自成圍

玉井誰將仙種移依稀月下靚羣妃行來白鷺渾
難認看似瓊花卻又非擘破秋房香更嫩取將雪
藕脆還肥高堂對此眞堪賞何用樽前粉黛圍

玉壺園

在錢唐門外菩提寺西東坡詠南漪堂杜

西湖百詠卷上

三

鵑花卽此也紹興間劉鄜王建園玉壺軒
歷年尙存淳祐中別建四面堂景定間改
建隸內司扁明秀繼撥賜慈元姪爲府續
後歸慈元殿

莫問南漪與玉壺杜鵑還更試花無坡仙一顧吟空
老地主頻更景不殊船出斷橋春澈遠鐘傳蕭寺晚
樓孤山明水秀軒扉敞落日漁歌過裏湖

誰創芳園號玉壺杭人曾識此名無雖云景物如
先美堪歎韶華與昔殊岳穆廟前雙樹古逋仙祠
畔一岑孤西湖因得東坡重未必東坡戀此湖

先得樓

雲在錢唐門西卽錢唐正庫酒樓也咸淳中
諫官劉州里以三篆字揭之

激灩澄波漾彩椽柳絲晴絆俊游鞭傍湖莫厭官樓
小得月無如此地先迎榜書生空絳帳抱琴才子沃
金船壺天蕭爽人人醉雪色屏風畫謫仙

香朱豐畫棟碧油椽馬上王孫指玉鞭白晝迴涵波
影闔清宵最得月華先倚闌堪弄桓伊笛載酒還
來賀監船更有梅花便此景一聯香影屬逋仙

古柳林

西湖百詠卷上

四

在錢唐正庫西大昭慶寺東北抵楊和王
雲洞園

幾眠幾醒幾清明萬態風流學老成古翠碧連雲洞
杳夕陽西捲射場平絮團破徑應迷蝶枝壓荒牆不
蔽鶯松菊賸栽堪卜隱苦無十畝秫田耕

小一抹稍頭夕照明春光老盡綠陰成風流張緒今
安在寂寞章臺恨未平飛絮有時迷舞蝶深林何
處覓啼鶯老夫亦有陶公興來此閒吟爲息耕

雲洞園

在昭慶寺北馬軍教場後紹興末楊和王

建園擁土爲洞塗門以雲有堂曰萬景天
全亭曰紫翠間臺樹扁額皆清麗今花柳
參差中有婦人墓

下湖營圃藉元勳景色天然曲折分水脈窅花通活
港洞基壘石走空雲千間大厦歸春夢一撮危亭納
夕曛扁畫自懸碑自壓當年何事立孤墳

番園中殘碣紀先勳藥圃蔬畦次第分竹下流泉宵
漾月林間幽洞曉生雲尋芳游客酣春日弔古詩
翁詠夕曛野鳥如歌又如怨杏花零落美人墳

霍山祠

西湖百詠卷上

五

在溜水橋西霍山廣惠廟長慶寺僧主香
火神姓張名渤血食廣德軍祠山累封至
眞君乾道中剏行祠於此

霍家山下儼祠宮溜水橋西透鼓鐘古蹟建平遺烈
在春風廣惠命詞封露臺獻社呈蒼馬陰壁飛旌繪
赤龍蟻聚乞靈人散後雲街雨陌撼濤松

祠山幾處有行宮此處常聞朝暮鐘曾覽搜神舊
時記誰知廣惠累朝封案前素供盤無豕身上朱
袍繡作龍要識香燈傳已久廟前千尺覆喬松

湧泉

在霍山祠西清水院門相對有泉從石罅
湧出思陵遣使汲泉瀹茶泉自石龍口細
噴入池池有小亭覆之今亭傍爲化場

山腰溜脈出遙峰隔此西湖翠幾重疊疊漫依僧刹
久煎茶曾入翰林供亭心覆雨塗丹鳳石口濡雲噴
玉龍何日星馳天使絕不知誰利涅槃宗

不知源出自何峰螿石爲池苔蘚重汲注僧庖青
竹引取烹御茗翠甌供亭中坐聽聲滿玉煙際流
來勢走龍汨汨泠泠落溪澗遠隨江漢去朝宗

東西馬塍

西湖百詠卷上

六

在溜水橋北羊角埂是也河界東西土脈
宜栽花卉園人工于種接仰此爲業間有
園亭不過養種西塍有土神廟額扁作馬
城

土城聚落界西東業在澆畦奪化工接死作生滋夜
雨變紅爲白借春風幾家衣食花姿異兩岸園池地
勢同病叟扶鋤鋤晚照前身莫是橐駝翁

馬塍西接馬塍東栽植園人技甚工幾陣廉纖紅
杏雨數番淡蕩碧桃風馨香色色花開別紅紫般
般種不同他日扶筇來飽玩誰攜春酒勸吟翁

石函橋

在水磨頭樂天湖石記云錢唐湖一名上湖周回三十里北有石函南有筧凡放水溉田每減一寸可溉田五十餘頃此州春多雨夏秋多旱若蓄洩及時瀕湖千餘頃田無凶年矣橋下鑿斗門字尙存記在燬

火隅內

函開函閉管年豐白傅能方夏禹功湖石記埋泥蘚裏斗門字蝕水花中犁平阡陌猶春雨船載笙歌自晚風遍倚暮闌懷古往月明無奈瀑聲空

西湖百詠卷上

七

蓄水溉田期歲豐樂天爲郡豈無功橋名舊揭高碑上湖記今存斷碣中人玩石函苔蘚刻舟移湖曲菱荷風香山歸去俄千載姓字長畱事蹟空

孤山路

在石函橋西南由德生堂過斷橋至孤山出西林橋此隄是也樂天詩云誰開湖寺西南路草綠裙腰一道斜咸淳間郡守就

隄上叔亭三

翠微四絕載蓬瀛柳引游人入畫屏詩借樂天傳得遠山因和靖隱來靈半空梁架橋闌赤一道腰分草

界青妝點風光如此盛藕花香裏又三亭
老逋元不慕登瀛屋外雲山結翠屏斜過斷橋苔
暈合慣曾迎客鶴心靈林花片片風前落徑草茸
茸雨後青說與攜壺遊賞客不妨三處憩幽亭

欲朱德生堂

帝恩蓋在孤山路口卽舊放生池亭每歲祝聖節
效生於此慶元四年又建別立碑亭其文有曰
字空取言鳥獸魚鱉咸若商歷以興夏事誤作商用
意天吳賦士論非之清祐八年重建御書德生堂飛
龍臺御書派亭二扁

西湖百詠卷上

八

瑤臺瑞滿玉皇家澤溥山巔與水涯魚躍鳶飛涵德
意天長地久演年華金搖巨扁雙龍護翠掩高碑一
字差須信石頑能萬古老龜無語問鶯花

放生池本爲官家聖主仁恩徧海涯溥使含靈蒙
帝澤盡教異域慕中華節逢天壽咸稱賀文燦星
光未必差遙想當年公宴畢醉斜烏帽插金花

總宜園

在德生堂西張內侍園摘東坡詩淡妝濃
抹總相宜御書堂扁

望極湖山變幻奇萬千光景自紛披妙分西子爭妍

態絕想東坡得句時柳徑曲埋兜率寺花陰直接放生池內官愛展亭臺去盡付年華與酒卮

湖山姿態四時奇吟玩閒將鶴髻披想見東坡題句日正如西子靚妝時香風蝶遶茶蘼架晴日魚翻菡萏池園號總宜高揭扁不妨來此醉霞卮

斷橋

在總宜園西唐張祐孤山詩云斷橋荒蘚

合空院落花深或謂段家橋非咸淳中展

壺空重

建

繡轂青驄驟晚風柳絲裊石闌紅彩篙刺水停飛

西湖百詠卷上

九

鷓華表侵雲截臥虹杖履誰歸瀛嶼去笙歌自補玉壺空重招張祐商新詠不與當時蘚合同

拂橋裊娜綠楊風曲曲雕闌映水紅遊客過時徐鞚馬微波映處儼垂虹清新張祐詩還在寂寞林逋宅已空景物不殊人事改落花啼鳥古今同

大佛頭

在石函橋西俗呼西石頭秦始皇東巡浮

海纜船於此宣和中僧思淨卽喻彌陀就

石刻佛半身舊時西湖通海東至沙河塘

南向一帶皆江也

不是金塗丈六仙莊嚴法界想西天自因僧淨鑄空
像誰說秦皇纜海船全體未知何日現半生且坐此
山禪石頭照水無塵土飽聽鐘聲雜管絃

形似西來印度仙半身長映水中天誰令巧匠來
鑄石浪說秦皇此纜船日炙雨淋遺幻體天荒地
老坐枯禪曾移畫舫隄邊泊綠綺閒調月下絃

葛嶺

在大佛頭西葛仙翁往來煉丹之地今兩
岸多園館間有僧廬

白雲幾登翠峒重往往疎鐘出梵宮石骨誰人鑄佛

西湖百詠卷上

十

像嶺頭何處覓仙翁樓臺水月丹青地簾幙鶯花錦
繡叢遊子莫支蒼竹去風雷容易起虛空

嶺頭雲氣起重重仙館參差映佛宮誤國會居前
代相煉丹那得舊時翁當初占斷湖山景今日俱
成瓦礫叢野老扶筇來弔古薰天富貴總成空

保叔塔

在巨石山上又名石甌山郡國誌云上有

七層古塔開寶中錢氏建寺咸平中土僧

承保入市募修當坊俗人呼爲保叔以此

名保叔塔方輿勝覽載保所塔非治平中

改崇壽額僧徒專以年建預修冥會普結
衆緣

咸平曾有募緣僧遍走街坊負叔稱定力一堅無外
想窈波七級可中興愚夫春日燒冥箒道者昏時爇
梵燈祇怪青龍行雨過煙雲偏護最高層

保叔由來苦行僧募緣成塔世咸稱只因南渡人
煙衆遂使西來教法興嘹亮笙歌諸處舫周圍星
斗半空燈昔年我亦閒登覽直上青雲第一層

巾子山

在保叔塔西金輪寺後傅牧西湖勝跡事

西湖百詠卷上

十一

實云形如巾幘和靖詩云巾子山頭烏柏
樹清霜未落葉先紅

岌嶮山形醜莫收傍湖獨整傲春秋幾株烏柏無根
在一幅華陽有樣畱寒日霜乾還掠額曉天嵐重且
遮頭東籬漉酒人知得醒立風前不可求

山頂雨餘雲氣收形如巾幘幾經秋初疑元亮當
年造又似林宗此日畱最喜花枝紅插鬢還愁雪
片白盈頭華陽欲製因無樣觀此何須別去求

水月園

在保叔塔南紹興間楊和王建園御扁水

月阜陵朝撥賜享秀王

園門當路掩清華喬木靈根裏翠霞地擁樓臺齊葛嶺天分香影傍林家中興勛將曾營業外郎王孫且看花月色水光三十里何人來此泛仙槎
夜愛波光泥月華朝看水底漾鮮霞由來堪作神仙宅誰料都歸富貴家萬斛秋香飄桂子幾家寒影浸梅花良宵一舸湖心泛絕勝當年博望槎

水仙廟

在水月園西廟創梁大同年間號錢唐湖

龍君廟錢氏繼請額穹碑尙存乾道中重

西湖百詠卷上

十一

建寶慶間郡守別建蘇隄上乃謂舊廟有視湖邈焉牽連遷就之說梁大同時今幾

水傳矣

雲翹雨佩有遺仙香火甯隨世代遷廟始大同年紀著額頌乾化較碑鐫鳳聞露輦荒瑤草龍溼秋衣翦玉蓮隄上剏新誰述記卻無門外一泓泉

龍君卽是水祠仙祠建梁朝已再遷華扁高懸神號在蘇碑猶有舊文鐫粉垣翠覆千竿竹碧沼紅舒萬朵蓮時見乞靈來往客採將蘋藻薦清泉

寒泉

在水仙廟相對東坡詩云不然配食水仙
王一盞寒泉薦秋菊謂和靖也舊名薦菊
井上有亭咸淳中增建重揭寒泉二字

照膽寒泓覆有亭此泉曾入老坡評入詩最得吟梅
苦一盞能消薦菊清不拜韜光徵士詔卻傳配食水
仙名銀牀響絕無人汲墓在孤山木自榮

誰於井上覆紅亭泉味坡仙昔見評一盞醉魂傾
卻醒半甌詩骨沁來清想應和靖曾親汲肯讓參
寥獨擅名取去禁中煎御茗井神因此亦光榮

參寥泉

西湖百詠卷上

三

在上智果佛殿後東坡在黃州夢與參寥
子道潛賦詩覺而記兩句云寒食清明都
過了石泉槐火一時新後七年守杭參寥
住智果寺有泉宜茶寒食日泛湖訪之忽
憶舊夢因以參寥名泉十六客分韻坡得
心字詩刻及題梁歲月墨跡至今尙存

湖曲春風正禁煙試茶味此石間泉坡仙忽憶黃州
夢潛老初拈智果禪幾客醉遊三月裏一聯詩兆七
年前題梁妙墨如新染合與雲崖淺井傳

正當榆柳換新煙試茗還斟石罅泉坡老已符槐

火夢參寥只話葛藤禪歲時曾記危梁上寒甃今
存古殿前六一後人偏愛慕此名宜與竝流傳

倚空窗

在壽星寺南相傳葛仙翁煉丹於此井作
雙口有石函沈浸井底居人飲此病莫能

染下竺又有煉丹井

仙翁洗藥傍西湖脈與靈山碧溜俱泉迸一支源更
異甃分雙眼味何殊石函霞湧沈鉛汞井屋風清轉
轆轤日日汲花朝復暮當方曾說病人無

仙瓢不汲麗人湖別引巖泉孰與俱堪愛靈源流

西湖百詠卷上

七

更潔取煎春茗味猶殊一爐晝夜烹離坎雙甃晨
昏響轆轤我願居民同飲此更令疴瘵盡皆無

江湖偉觀

在壽星寺最高處元名觀臺淳祐十年改
建其上更創兩亭直至山椒東坡祠在觀

之北

倚空窗戶不曾扃兩眼風煙障翠屏西子豔分晴雨
倦伍胥魂激浪濤腥鼓簫咽晚難無酒花柳爭春別
有亭恨掩四時歌舞去古祠寒玉幾竿青

層闌吟倚豁靈局萬疊雲山總畫屏竺岫隔湖舒

鳳翼胥濤捲雪帶龍腥嘯歌風月無他處歷覽乾坤有此亭欲喚坡仙同醉酒飛來白鶴海天青

古澗此君軒

在壽星寺西廊僧房中窗外多竹此扁尚是故物寺門坡下亭名一擊軒基不得而考坡詩云一舸鷗夷江海去尙餘君子六千人

瀟灑幽扉掩碧叢塵昏題扁想坡翁六千君子寒光落十二闌干晚色空僧指舊基埋積雨鳥翻新籜起枯風蒼涼不障層坡峻一擊亭開夕照中

西湖百詠卷上

五

雨後移來嶮谷叢幾竿瀟灑對禪翁王猷逕造狂招謂坡老畱題跡已空涼影玲瓏搖夜月寒聲蕭瑟起秋風此君節操何從見都在三冬冰雪中

杯泉

在壽星寺法堂東簷下坡詩云石眼杯泉舉世無要知杯渡是工夫可憐狡獪維摩老戲取江湖入鉢盂

古甃澄泓照膽清畫龍壁上挂瓢輕汲來不療相如渴掬處難供大白傾傍屋四圍埋石色侵山一溜走溪聲鉢盂可攬江湖闊參取詩禪放眼明

石眼潛流一掬清山瓢細細挈來輕吟消酒渴瓊
杯漱涼沁詩脾翠杓傾瑩甚淺浮青玉色冷然微
韻綠琴聲吟翁夜半思煎茗呼取蒼頭汲月明

初陽臺

在寶雲山上葛仙翁登此吸日精月華山

下產茶今臺在集芳園東

瑤山山頂結芙蓉方士凌虛幾御風日月光華含吐
異雲萍蹤跡往來空石盤草子黏深碧土級苔花剝
碎紅側近又將精舍展蓬瀛有路直能通

臺前山列翠芙蓉仙侶簫吹鶴背風每吸霞光餐

西湖百詠卷上

六

顥氣擬乘颺馭遡遙空年來漸覺雙瞳碧老去長
看兩臉紅九轉丹成卽輕舉浮邱已有信音通

孤山

在西湖中孤山路西建炎前多有民屋間

以四菴院山背皆花圃及塚隧山之東爲

林和靖隱廬就葬其下紹興中建延祥觀

奉四聖香火獨畱和靖一墓民屋菴院悉

徙山北觀東爲園累朝臨幸寶祐二年分

地之半建西太乙宮陳朝柏在和靖墓南

縹緲蓬萊擁翠寒百年營取屋千間黃庭殿竊煙霞

老瀛嶼堂幽日月閒水泛花陰藏輦路牆分柳色護
仙關林家梅塚陳家栢萬古流芳鎮此山

碧嵐蒼藹畫生寒蓮宇琳宮紫翠間坡老詩招僧
入社逋仙心與鶴同閒深深花鴨畱春住寂寂松
扉帶月關雪裏梅開千百樹遊人笑指玉爲山

劉敬和靖先生墓

古松在孤山東北隅錢唐隱士林逋字君復童
鶴自隨結廬於此累詔不起賜號和靖處
士天聖六年卒諡和靖先生葬所居後紹
興中建御園有詔勿遷此墓

西湖百詠卷上

七

詔旨天頒起臥龍首邱甘老水雲東一聯香影孤山
月兩架茅茨萬古風有鶴有童家事足無妻無子世
緣空清標卓絕何人繼表表仙宮隴樹中

古松偃蹇若虬龍綠草荒墳岳廟東北闕幾回微
隱逸西湖千載著清風一聲老鶴歸何處千樹寒
梅盡已空近日杭人誰好事墓碑扶起棘榛中

陳朝柏

在孤山東陳天嘉二年嘗植二柏其一爲
人所薪其一堅悍如金石愈於未枯者坡
詩云雙幹一先神物化九朝三見太平年

阜陵書此詩刻石

枯株獨壽憶雙棲誰想天嘉翦鬱時坡老詩成無繼
筆阜陵書此有遺碑日搖槎影龍蛇斷雪綴花痕鳥
雀疑化石可期人莫訝柏堂不復辨荒基

喬枝曾見鶴來棲霜雪難侵歲月時鐵榦共稱陳
代物坡詩猶刻宋朝碑人於得失何須較物有榮
枯詎足疑靖節祠堂無復在樹傍或可訪遺基

望與馬瑙坡

風回日澗在孤山東地有碎石如瑪瑙色樹叢水坑

支野雲巖甚深今傍路尙存兩大頑石

西湖百詠卷上

六

支逕逶迤混碧苔樹根接水沒蒿萊兩坡截路基分
處何日經人斧鑿來誰說異光迷草野要知遺蹟等
塵埃孤山瓦礫曾聞道寄與貪夫莫浪猜

雨晴行逕積莓苔錦石雖存翳草萊莫作寶看潛
鑿去聊供珍玩獨尋來正當湖曲孤山路不受人
間半點埃能視黃金如土苴物情眞贗莫深猜

金沙井

在孤山前樂天嘗酌此泉謂其甘美可愛

視井傍沙光粲有金星寶祐初井前重建

墨溱堂御扁德馨

沙漾金星湧活泉
虛堂龍染德馨懸
朱繩汲冷梅林外
翠鬢圍涼桂洞前
石鼎煮茶非異事
井闌鐫字是何年
西南雲擁仙人屋
品酌今誰想樂天

金沙粲粲映清泉
絲綆嘗將碧甕懸
斟灌嘉蔬流竹下
汲煎芳茗傍花前
不因白傅畱題品
那得皇家紀歲年
堪笑尋芳往來者
有人坐此欲觀天

六一泉

在孤山西歐陽文忠公將老自號六一居
士杭僧惠勤文而能詩出公門下東坡倅

杭時嘗因公所囑到官三日訪之明年文

西湖百詠卷上

九

忠薨坡哭於勤舍坡離杭十八年重來守
杭則勤已示寂堂後有泉因推本其意名
之泉銘在亭上坡於泉後鑿石爲室名東

坡菴

離別孤山十八年重來忍見講堂泉當時同出師門
下今日多傷井屋前取重歐公名有自肯教勤老跡
空傳此銘此意畱千古鑿石爲菴不可眼

同門曾記哭師年
今日愁嘗舍後泉
泉脈潛流蒼石罅
淚痕猶漬碧崖前
心傷勤老歸何處
名與文忠喜共傳
白髮漁翁知舊事
滄浪歌罷對鷗眠

西林橋

在孤山西卽古之西村喚渡處

水竹雲山拱畫圖因懷喚渡想東都雨遺晴竦脚西
照風遶春船入裏湖闌曲祇供遊子凭林間今有隱
人無隔牆莫是神仙宅紅白梅花五百株

詩難題詠畫難圖盡說錢唐勝汴都關擁狻猊高
映水橋環蝶竦近臨湖東風客每攜壺過落日人
還喚渡無最是春來猶可玩桃花千樹柳千株

鳥巢

在定業院後唐元和間建鳥巢禪師開山

西湖百詠卷上

三

師名圓修富陽人代宗朝遊長安遇國一

禪師得法而歸棲止此山長松結蓋鵲巢
於側經四十秋樂天守杭入山禮謁太和

七年示寂後人發塔惟見銘誌

松頂巢成亦甚危元和禪此太和歸比邱隨處心傳
異刺史遊山禮謁稀銘誌土侵無幾字塔亭雨壞有
孤屏一空四十年間夢定業門前鵲自飛

危處無虞平處危松巔巢與鶴同歸僧流行比圓
修少郡守賢如白傅稀枝上看看成佛果林間寂
寂閉禪扉相依尚有當年鵲月下還來繞樹飛

樂天竹閣

在廣化院樂天守杭日建紹興中寺徙今
處重建竹閣有鄭清之記樂天詩云晚坐
松簷下宵眠竹閣間

此君玉立此樓空不復幽眠想白公百尺有簷侵碧
落千竿無語足清風闌尖亭影流漁屋龕面祠香托
佛宮石琢端平丞相記都歸寶慶守臣功

竹間高閣勢凌空後世人稱白傅公一榻清虛延
夜月四簷蕭瑟韻秋風笙簫時過遊人舫鐘磬遙
傳佛氏宮民樂耕桑無水旱穹碑猶紀郡侯功

西湖百詠卷上

三

岳鄂王墓

在棲霞嶺口葬名將太師忠武鄂王岳飛
於此

將軍魂夢遶旃旒偃月謀成尙忍言一旦風波誰左
袒八陵荆棘自中原更無鴈帶邊頭信惟有天知地
下冤鬱鬱棲霞霞外樹墓門不掩鶴巢喧

精忠賜字繡旌旒掃淨腥膻有誓言大將一朝身
竟殞權奸千古罪難原烏墳東海那消恨鵲叫南
枝若訴冤四季棲霞嶺邊路邦人祭奠鼓聲喧

妙智菴洞

在樓霞嶺頂妙智菴東其地多石厥土剛
燥歲剗日鑿倚空如懸咸淳中洞外爲亭
焚重人稱之曰暢亭曰淪俗此洞近時編入圖經

梵菴雲隔洞高虛傍路陰森樹幾株石室跨空山骨
碎林風掠地土痕枯兩亭淪俗秋偏暢六月披襟暑
欲無如此巖牆難此立有人編入職方圖

誰構雙亭倚碧虛遠菴綠樹幾多株洞門炎夏寒
猶在石眼清泉旱不枯客至一襟涼思爽地偏半
點俗塵無世間若有王摩詰來此須應寫畫圖

九里松

西湖百詠卷上

三

在一字門裏舊名袁公松門唐開元間刺
史袁仁敬夾道種松錢唐吳說書九里松
三字揭之紹興中思陵幸天竺回易以奎
扁終不稱聖意旨令金填說書重揭之至
今尙存

開元刺史擅清風九里親栽夾道松屋頂自生濤浪
勢根頭誰覓茯苓蹤行春橋掩雲千態一字門封翠
幾重人訝金填吳說筆不知此筆遇高宗

刺史袁君有古風沿湖九里植蒼松涼颺度處琴
調韻積雪晴時屐印蹤一路波濤聲涵涵兩行幢

君出沃壤今因鮑相傳野水平橋初過雨落花滿
地正啼鶉秋成早晚皆收穫穠稔穰穰載滿船

忠勇廟

在九里松行春橋西前軍統制張玘紹興
末從張子蓋解海州圍玘戰沒贈承宣使
建廟海州及本軍門首賜諡忠勇

纔接軍符便起程此行要竝鐵山名孤忠解得孤城
急一勇判來一死輕堂屋依湖空柳色廟門當路枕
松聲丈夫對着褒榮典誓挽天河洗甲兵

言掃匈奴不計程將軍忠勇素知名一心要解圍

西湖百詠卷上

五

城急萬死甘將性命輕古木秋風荒廟貌空山夜
月慘猿聲奸邪只說和戎便從此朝廷怯用兵

將軍教場墓

在行春橋水竹鳴內俗呼馬三寶墓紹興
末因廣教場此塚獨高大衆欲去之方舉
錘間有黑蜂數百飛出不可向是夜戎帥
夢一高冠朱衣曰吾錢王之子葬此已久
祈勿毀方怪之詰朝得本軍申遂畱此墓

閱武場開傍古松忽驚塵起廢牆東黑蜂飛毒歸鉏
下白骨通靈人夢中花草地寬千騎勇鼓聲撼一

蓋影重重森然總是徂徠種想與秦封不共宗

玉泉

在演空寺內齊建元中靈悟大師曇超卓菴演法於錢唐靈苑山龍君遠來聽法又爲撫掌出泉砌以方池畜大金魚有景定

間周棟記

南齊事蹟已銷沈曾立苔碑記古今一老出泉猶撫掌此僧演法欲傳心樹頭龍過家家雨池面魚游尾尾金行客不須閒照影要知澤物溥春霖

說法禪翁跡已沈靈源一派顯於今遊人來洗塵

西湖百詠卷上

三

凡耳衲子坐澄清淨心泉噴池中皆白玉魚游水底盡黃金龍君香火相傳久大旱應須去作霖

鮑家田

在東山衙北田上多種白蓮利溥於稻吳越相鮑君福賜田錢唐至今名焉有玉泉

水流出灌溉

衙轉東山憶故錢錢家曾賜鮑家田地名有自誰能考相業無聞姓卻傳種藕戶繁招宿鷺尋花人倦信啼鶉玉泉流蔭分西去併入官塘漾野船

一畝膏腴直幾錢人稱此處總良田靈泉昔爲龍

坏空若錢若馬訛傳久誰覓埋銘證異同

一灣流水數株松舊塚巋然廢苑東枯飢恐拋秦
棘裏精靈默感夢魂中黑蜂散去荒邱在白鶴歸
來故國空此地久無人閱武寒鴉古木景長同

靈隱天竺寺門

在飛來峯牌門東俗呼二寺門又名方外
門慶歷八年太常博士元居中書扁知杭
州蔣堂立至今不易

畫棟朱簷暴虎蹲亂鐘穿翠掩朝昏去來所得無多
衲覺悟何曾有二門山鳥山花應自若佛心佛法與

西湖百詠卷上

五

誰論風埃幾換行人鬢博士元公扁卻存

小朵峯如虎豹蹲上方鐘磬報晨昏諸僧會供過
千鉢四寺殊宗共一門靈澈詩工今鮮比曹溪派
遠近誰論侯君大字真迺勁尙有飛來舊扁存

合澗橋

在飛來峯路口靈山陰北澗陽卽靈隱寺
靈山南澗陽卽天竺寺二澗流水號錢源
水遶寺峯南北而下至峯前合爲一澗

危關壓定活流重誰識錢源遠梵宮兩澗共歸橋底
合萬雷莫敵水聲雄遊人移步心還恐野衲棲禪耳

欲聾石倚臥梁山月落白猿一嘯五峯空

綠樹層層怪石重東西澗遶梵王宮橋間流過雙
溪合雨後聲喧萬鼓雄遊客喜聞成久立老禪無
聽似真聾碧闌我昔曾來倚俗累都教一洗空

北高峯

在靈隱寺後山唐天寶中建磚塔七層會
昌中燬大中復興至錢氏重修至道二年
雷火燹涸化後屢修元豐中重建咸淳七
年燬滅作五層

旛竿裊影入青冥暮鼓朝鐘鎮不停劫火幾灰龕底

西湖百詠卷上

三

像西風兩滅塔層鈴市人祈福心苗異廟祝求金口
角靈三十六彎登絕頂日中長玩七元星

千層翠聳入冥冥雲合雲開不暫停前代捨資營
石塔下方仰面聽金鈴客躋絕頂何辭倦人叩叢
祠爲乞靈老衲禪燈當靜夜分明移下半天星

韜光菴

在法安院後韜光禪師不知姓名唐代宗
朝出蜀師囑曰遇天可前途巢卽止此山
名巢溝鳴值樂天守杭遂隱焉樂天招以
詩師有難教下碧天之荅師與樂天歸洛

後示寂香山菴

悟得師禪隱此林漫傳難下碧天吟巢溝鳴上無人
迹雲月堂前樹有陰家棄蜀鄉年歲遠身潛洛寺屋
廬深死生托得香山去可遂西來一片心

開寺菴藏寶樹林白公來訪費清吟桂花茶煮雙
松下貝葉書翻萬竹陰飛鶴影橫山月小啼猿聲
度嶺雲深昔曾與客躋攀到到此都忘富貴心

西湖百詠卷上

三

西湖百詠卷下

靜傳居士董嗣杲明德作

餘姚後學陳贄惟成和

石筍峯

在韜光菴西普圓院後西北一峯嶄然特立高數十丈相傳以筍名之

異種休參玉版禪嶄然一角立層巔遠尖自抱雲根壯疊蘚誰疑雨籜纏夢裏三生休過眼胷中千畝謾流涎此龍難入甯僧譜出土摩霄是幾年

昔聞玉版妙參禪如筍尖峯聳碧巔雨過似將斑

西湖百詠卷下

一

籜洗苔封猶訝錦綳纏故知坡老胸無礙卻怪饒師口抹涎底事不抽枝與葉森然成竹是何年

西溪

在靈隱寺山背居人能力其勞漁樵耕牧各遂其業楊蟠詩云爲愛西溪好長憂溪水窮山源春更落散入野田中

漁樵耕牧自成村就屋編籬古意存出隄野雲多曲折過橋溪水半清渾一逢白壁書香社幾見朱闌障墓門地利最饒人事簡山家還有別乾坤

西溪曲曲遶西村民業農桑禮意存數朵間雲山

入畫一番驟雨水流渾綠蘿葉密遮茅屋紅杏花
開映華門不與桃源風景異彼乾坤卽此乾坤

飛來峯

在靈隱寺前晉咸和元年西天竺國靈鷲山之小
登茲山歎曰此是中天竺國靈鷲山之小
嶺不知何年飛來因止錫建寺山之靈隱
兆於陶唐時飛來之說傳於咸和年間

理公着腳五峯前樹石蒼浮滴翠涎因指何年飛到
此要棲中國悟來禪一猿可驗爲靈鷲萬古無言有
冷泉今日共知遺跡勝隱名卻自許由傳

西湖百詠卷下

二

正當靈隱寺門前深洞潛龍或吐涎曾有黃猿閒
獻果何妨緇侶靜安禪石間高聳無名樹山足長
流不息泉天竺鷲峯分小朵遠飛來此異僧傳

冷泉亭

在飛來峯下唐右司元稹建刺史白居易
撰記按古誌靈隱澗古許由嘗飲於此盧
仝父詩云問山何以名靈隱山曰當年隱

許由

小朵峯前玉鏡寒幾回倚杖聽潺湲箕公飲澗非凡
水慧理呼猿是此山亭角靜依金剝古樹身涼臥石

關開無因可洗人間熱時御清風照影還

一勺嘗來冰齒寒亭前終日響潺湲靈源瀉出穿
西澗別派分來遠北山飲水黃猿攜子至窺魚白
鷺比僧閒詩翁欲試先春味碧甕呼童遠汲還

呼猿洞

在飛來峯之中僧慧理曾呼猿於此名呼

諸猿洞楊蟠詩作呼猿澗

此隱鍾靈莫計年此猿清嘯洞門前當時不有胡僧
喚今日應無野迹傳寒掛古藤申右臂晚藏碧樹憶
西天雲巖煙谷多遺種月下三聲醒客眠

西湖百詠卷下

三

洞號呼猿不計年引兒來飲碧溪前當初曾聽胡
僧喚今日留爲故事傳白晝深藏雲滿樹清宵長
嘯月當天一聲啼過喬松頂驚起巢間老鶴眠

龍泓洞

在靈鷲院理公岳北赤烏二年葛翁於此

得道輿地誌云有洞徹於江下過蕭山採

石乳者入洞聞波濤聲

葛翁行滿赤烏年丹竈離披已絕煙龍在此泓誰可
見路通別邑自相傳樹頭雷雨遺神火岳腹莓苔帶
海涎有耳不須聞浪湧只消採乳亦通仙

葛令冲昇是幾年舊棲虛掩薜蘿煙雲邊鶴馭難
重見岳下龍泓是昔傳誰入重淵聞激浪孰云深
洞有遺涎西湖不與丹邱異何用乘風遠慕仙

理公品

在靈鷲院方丈後晉僧慧理偃息之地岳
下通人往來淳祐中主僧行果始作閣道
以祠慧理

西來識得此雲根終此雲根護法門由晉尙傳斯語
在到今休想舊岳存天開教觀香燈盛人仰胡僧相
貌尊行果芟教荆棘盡分明隻手破沈昏

西湖百詠卷下

四

蘿龕曾結傍山根聞有於菟爲守門施食臺荒花
自落翻經人去石猶存雲遮湖上山千疊月照岳
中像一尊隣寺今餘幾僧在數聲清磬送黃昏

香林

在下天竺後塔西日月岳左舊名香林洞
又名香桂林今直扁香林

日月岳頭古翠埋絳雲深隔洞門開蒼藤隨石無根
活靈杞何年有種栽氣凝野煙疑麝過暖熏山雨誤
蜂來空亭誰領幽芬坐雪鶴同行損綠苔

自昔靈根月窟埋移從人世賸花開未將白玉堂

前種卻向黃金界上栽
月照千株清影動風傳萬
斛異香來少年攀桂今
衰老策杖重尋步翠苔

仙人開翻經臺

一料資前在下竺香林門道裏謝靈運與僧於此將

北本涅槃經翻爲南本三十七卷舊有七

葉堂

過門跬步入香林七葉遺陰地尙靈曾借東山康樂
手共翻北本涅槃經關腰葉擁空臺赤石罅泉通遠
笈青雲掩蓮花峯下座若人演義若人聽

昔聞康樂訪祇林玩水登山豁性靈學道遍窮三

西湖百詠卷下

五

教旨與僧同譯幾函經舊臺猶在雲長護行徑無
蹤草自青想見當年鳴梵唄老猿應向月中聽

重榮檜

在下竺懺堂後相傳隋代所植後爲兵火

延燎至大中祥符間復茂盛或謂遵式懺

主灑水誦咒故重活

一株蒼檜臥龍身受得隋朝雨露深地下仙根將換
骨人間劫火不燒心死條節節蕃春信生意枝枝翫
翠陰此木豈知魂可返爭傳咒水出叢林

恐是潛蛟變化身風霜飽歷歲華深當初枯槁甯

非數今日重榮豈有心
雨過童童擎翠蓋
日長鬱鬱布濃陰
不知隋代何人植
得接金山寶樹林

鍊丹井

在下竺西廊下
葛仙翁有丹在井
井水可以療病

稚川曾此倒靈瓢
關上銀牀壓鬢腰
丹氣騰空知幾轉
神光射屋起中宵
有茶可品春煎細
何疾能治曉汲遙
萬古仙蹤應不泯
轆轤聲落病僧寮

葛翁昔此汲仙瓢
藥滿葫蘆繫在腰
鍊得丹成非一日
不知羽化是何宵
青山人去烟霞秘
碧鬢蒼

西湖百詠卷下

六

荒歲月遙緇侶剝
嘗消宿恙時聞僧
梵出禪寮

跳珠軒

在下竺知客寮中
東坡和周次元激水云
道眼轉丹青
嘗於寂處鳴
早知雨是水
不作兩般聲
詩碑嵌壁

溪流穩信竹龍驅
聲遶闌虛入耳孤
此竅可消諸念妄
一丸長躍半空珠
掛瓢白水應知味
就壁龕碑不用
跌誰謂佛靈占有
驗始於兒戲果何殊

終朝城市厭馳驅
來探靈源興不孤
雨後琮琤如激玉
月中的礫似跳珠
支郎經室苔生砌
坡老詩

碑草沒趺煮茗有僧能別味此泉不與惠山殊

曲水亭

在下竺寺前一曰流杯亭有水臺盤在亭
心端平中風水拔木亭仆清祐間重建遵
式立陸羽二寺記碑尙存

竹色松陰翠浪浮春風吹落澗聲幽古亭當路空涼
透溪水循盤散漫流繭紙敘詩年幾換羽觴傳酒榼
重修晴嵐四掩鳴琴杳如在稽山道上遊

片片飛來水面浮陰陰竹樹景偏幽酒斟杯裏循
環轉泉遠亭心曲折流昔日右軍名獨盛如今榼

西湖百詠卷下

七

事孰能修願予白髮歸田客擬拉詩朋續勝遊

天竺觀音

在上天竺寺石晉天福中僧道翊見山間
光明得奇木命匠者孔仁謙刻觀音像建
看經院錢氏夢白衣求治其居歷代增廣
加厚田業賜資寶器至今雨暘隨禱卽應
木異難儕衆木淹刻成慈相孔仁謙眞珠瓔珞鴛鴦
殿白玉屏風翡翠簾晴雨禱祈隨感召香燈熾盛極
莊嚴鎮山寶聚田廬廣靈貺彌彰一百籤

上竺來遊竟日淹南能曹客禮尤謙香雕端妙龕

中相珠結玲瓏殿內簾
庶乞靈咸敬禮神天護
法極威嚴少年早有凌雲志
求得觀音第一籤

風篁嶺

在放馬場西路通龍井元豐中辨才法師
元淨淬治修篁因以名嶺東坡訪之送至
嶺上坡曰遠公復過虎溪矣辨才笑曰子
美不云乎與子成二老來往亦風流

橫陳翠葆列煙屏聯步蒼林想典型
二老相分龍井嶺一時如過虎溪亭
風搜貼石叢篁碧雨剝題名暈
蘚青更有澗流朝暮落此僧不厭客來聽

西湖百詠卷下

八

萬玉森森映翠屏來遊還想舊儀型
漫傳惠遠成三笑宜與東坡創一亭
風篠不時聲撼撼雲山終古色
青青行人倦就蒼陰坐滿耳蕭颯最可聽

龍井

在風篁嶺上本名龍泓吳赤烏中葛翁鍊
丹於此故老相傳井與海通其水隨潮候
長落

腥攢石縫瀑花多還有龍神蟄此窠
通海淺深山不語隨潮長落水無波
漫傳方士遺丹在
不奈潛鱗吐霧何時雨愆期無驗處
幾番雷火爇松柯

嶺有深泓積蘚多潛龍於此作深窠流傳有脈潛
通海消長隨潮暗湧波山客鍊丹名尙在居民望
雨事如何喬松偃蹇千年物底事雷神伐翠柯

辨才塔

在龍井演福院潮音堂西元豐中辨才自
上竺退休此山燕居十年後示寂東坡致
祭有文屬頴濱撰塔銘

瀾翻八十一年空爭訝前身是井龍心靜已成無上
智學知今復有誰宗雲生遺塔封慈相雨濺冲泉雜
定鐘幾字碑陰坡老筆聲聲想得舊遊從

西湖百詠卷下

九

隻履西歸世相空鉢中無復有降龍談禪深究三
乘法面壁還歸一指宗山畔苔荒秋雨榻林間風
送夕陽鐘東坡門下多名士外教當初亦景從

梅坡園

在小麥嶺北龍井路口旌德顯慶寺西恭
聖仁烈楊太后宅園

牆擁雙扉鎖錦窩溪聲不敵樹聲多誰家種麥曾名
嶺今日尋梅且涉坡萬厦棟梁巢燕雀四山風日養
松蘿園丁自飽栽花利月給楊家得幾何

花成錦繡草成窩自古名園富貴多直把金錢堆

作埒甯論瑪瑙砌成坡瓠瓜嫋嫋綠青蔓松柏垂
垂縮翠蘿麥嶺北邊龍井口荒涼今日竟如何

長耳相

在法相院石晉天福中泉南長耳和尚行
修真身在焉有碑載修爲定光佛後身平
日募人作福或問之曰能遮百醜

眉目如生骨骼寒後來曾紀短碑頑雙垂長耳過肩
角千古道軀落世間覆履有方隨迹滅守龕無語向
人閒想知自醜難遮斷兩扇禪扉及早關

不畏炎蒸不畏寒幻軀畱得化冥頑神歸兜率天

西湖百詠卷下

十

宮裏形住閻浮世界間耳禪及肩雖說異口長無
語一何閒春光老盡遊人少寂寂松扉盡日關

玉岑

在慧因寺門相對此山木潤或傳山出玉
許采大書兩字刻石上少遊夜過龍井濯
足於慧因澗卽此也

雲掩風林萬竅號慧因橋畔息方袍秦郎閒濯溪頭
足許老清揮石上毫玉出何年迷草莽教傳異域想
波濤山門翠擁山嵐潤一道光芒月正高

登臨忽聽嶺猿號嵐藹蒼蒼溼翠袍傍澗汲泉烹

鳳髓磨崖題句運狸毫謾傳玉氣浮清夜時聽松
聲響怒濤歸上舵樓廻望處瓊瑤簪聳碧雲高

南高峯塔

在煙霞山頂天福中建崇甯中僧修懿修
乾道中道者義圓重建淳祐中賜榮國院
額塔後石穴祈雨嘗驗草菴在張帝殿下
塔西有捨身臺石

誰捨塵身石漫巔浮屠突兀拂霄躔方隅端拱明離
位梯級高營石晉年土穴有龍嘘重霧草菴無衲坐
空禪虛危直視煙霞路鏗鞳風鈴到處傳

西湖百詠卷下

十一

碧嶂高侵碧漢巔峯堯疑逼斗牛躔山中衲子甯
愁老峯頂浮屠不記年危磴雨晴難着屐深巖月
照稱棲禪遊人初到西湖者欲倩丹青作畫傳

煙霞洞

在清修院內石晉開運中僧彌洪遇異人
指有羅漢六尊錢氏遂刻十二尊足之洞
傍有象鼻峯佛手岫

萬色無如疊翠何何僧鑄像屹峩峩山屏晴掩牌門
杳風鑰陰封梵屋多象落鼻形懸洞右佛垂手跡寄
鐫阿燈輝金碧琉璃椀暗掩僧房絡薜蘿

爲問煙霞景若何洞前山接翠峩峩峯垂象鼻形
猶怪石刻神僧數更多梵唄尋常鳴月下禪龕重
疊傍鑿阿誰攜白玉如來手風動渾疑挽綠蘿

石佛菴

在煙霞嶺東南高峯路口後周廣順中有
行腳僧影貼石而行移時不見人遂刻其
像及佛像於石此菴頭陀世守香火有修
街石碑存

南峯雲墮屋梁危異蹟曾遺廣順時腳影行鐫岳石
澗頭陀老守草菴欹幾年香火傳朝晚萬谷煙霞擁

西湖百詠卷下

十一

路岐半掩風扉鐘又響風霜敝盡砌街碑

松蘿屋外掛猿危正是禪翁定起時石上異僧誰
與刻山頭層塔竝無欹橋通麴院深遮柳路入梅
州別有岐鑄佛甃街功蹟著前人文字紀荒碑

水樂洞

在煙霞路口開運中錢氏建名西關淨化

院有洞深窈水聲如擊金石熙甯中杭守
鄭獬名水樂洞涪熙中內侍李棗請額重
建佛宇增廣園池嘉泰中改賜楊后宅厯
年旣久水聲絕響賈府得之舊觀復還

築園裹寺接山椒如此經營豈一朝兩洞倚雲空鎖
鑰亂泉激雨想簫韶樹埋院落關門邃石菴亭臺棧
路遙白髮聾僧扶舊額金蓮又長玉淵苗

洞邊有樹結紅椒洞裏泉鳴暮復朝雨後依稀如
擊磬月中彷彿是聞韶山僧下汲還愁暗詩客來
聽不憚遙縱使農家逢大旱也難分去溉嘉苗

楊梅鴨

在石屋西瑞峯鴨內有老嫗金姓地栽楊
梅品味極佳俗呼金婆楊梅

仙子遺丹滿瑞峯纍疑與荔枝同金婆傳種移根

西湖百詠卷下

十三

異火齊燒空滿鴨紅鶴頂分丸凝曉露猩唇結顆綴
薰風曩時若解包茆貢一騎星馳入漢宮

楊梅千樹遶西峯色與神州荔子同火齊纍纍盈
鴨赤靈丹燧燧照林紅客嘗紫顆如甘露鳥啄朱
丸墮晚風味比櫻桃猶更美正宜貢入大明宮

石屋

在大仁院內錢氏建岳石虛廣若屋下有
洞路石上鐫五百羅漢石屋上建閣三層
雲梁煙棟翠嶽峯五百癡人謾飾金屋頂誰增華閣
重石頭自擁白雲深鐘聲透谷泉分響鬼力支空雨

聚陰無廢無興無啟閉老僧不動一心生

碧岳如屋勢嶽崑石鑿阿羅盡貼金行逕正堆紅
葉滿洞門長護綠苔深谷中夜雨添寒溜閣外秋
雲結暝陰此處真成閒寂境到來無復利名心

眞珠泉

在龍山寨崇政院內開運中建顯德五年
院東泉湧擊聲則泉出如貫珠景祐中元
絳名之州家取爲酒名雷峯塔路口張府
園有泉亦同此名

泉光四散駭猿獠迸起平池點滴高誰欲斗量徒積

西湖百詠卷下

十四

夢人將瓶汲肯辭勞聲隨夜雨穿疎箔名逐春風入
小槽別有雷峯峯下圃一泓隨沒在蓬蒿

月中或見飲泉獠顆顆圓明躍起高遊客關邊觀
處駭鮫人淵底泣時勞曾聞合浦珠還日莫訝天
台酒滴槽張府園中一泓在欲尋爭奈翳青蒿

虎跑泉

在大慈山廣福院內唐開成中建性空禪
師居此山無水有神人告之明日有泉是
夜二虎跑地遂泉湧

廣福山靈托獸傳鬚邊依約爪痕堅噬人難負平時

口跑地能開一掬泉不遇下車馮婦勇都因脫屣性
空禪大慈隲內腥風起善結叢林渴飲緣

地湧靈源自昔傳於菟亦解發心堅咆哮想是潛
施瓜涵湧俄驚忽迸泉可信神明真有感遂令老
衲足棲禪性空非是降龍手那得山君結勝緣

南屏山

在興教寺後舊多摩崖剝落之餘止存司

馬溫公隸書家人卦及米元章書琴臺二

字未詳所刻東坡訪僧臻詩云我識南屏

金鯽魚重來撫檻散齋餘今寺非昔比山

西湖百詠卷下

則蒼翠自若

南有屏山掩翠扉齊雲亭子漫尋基雨淋米老琴臺

字火裂溫公易卦碑回首金魚誰撫檻銷魂白骨白

汚池春風不管遊人老愁落朝昏戍鼓悲

山橫屏嶂帶嵐霏碧草荒苔古寺基無復元章存

舊刻孰云溫國有遺碑時聞黃鳥啼蒼靄尙見金

鱗泳綠池惆悵坡翁仙馭遠斷猿猶向月中悲

蘇公隄

在興教寺相對元祐五年東坡守杭開湖

中積葑築堤橫跨南北以制兩山之水詩

云天面長虹一鑑痕直通南北兩山春

青紅一綫界沙隄日日香風逐馬蹄三月桃花無浪起六橋柳色有鶯啼官亭飛蓋春相接酒舍收旗晚自迷游子豈知坡老意兩山長擁夕陽西

六處橋連十里隄往來遊客競輪蹄緋桃粉蝶翩翻舞綠柳黃鶯覩晚啼畫舫愛依汀葦泊酒旗應被岸花迷蘇公事業傳千古回首湖頭日又西

先賢祠

在蘇公隄南山第一橋下寶慶二年郡守

袁韶奏請倣紹興府鴻禧觀規模買地建

西湖百詠卷下

六

祠取錢唐自古名人從許由至張九成及節婦五共三十九人摘傳立石祠後建旌

德觀奉祠事

列仙始祖許箕公上國尊賢典禮隆三十九人裁信史百千萬禳紀清風衣冠文物流傳盛花柳亭臺曲折通鏡水在先祠越隱如今彼此可稱雄

憶昔賢哉太守公先賢合祀禮何隆祠堂能致尊崇意間里須興揖讓風行逕縈迂松下入流泉屈曲竹間通姓名雖列穹碑上誰是當時蓋世雄

西湖道院

在先賢祠後旌德觀中院之側有亭名虛
舟堂名雲錦

名祠相接啟殊庭巧對南屏萬疊青深院冷侵雲砌
竹虛舟閒載錦池萍廊頭道士書符簡門外遊人挈
酒瓶分坐夕陽斜背水鼓簫於此最宜聽

院中羽士誦黃庭門外好山螺黛青白鶴行穿幽
竹徑紫鱗時躍曲池萍仙翁去日封丹竈酒客時
遊倒玉瓶一曲洞簫吹夜月許誰來就此中聽

湖山堂

在蘇公隄先賢祠北第二橋下咸淳二年

西湖百詠卷下

七

郡守叔建後二年增建

彩檻雕闌倚地仙南堂深架北堂先湖光十里饒春
日山色三隄合霽煙簾幙香傳歌扇底鶯花影落酒
旗邊紅塵不受斜陽壓暗逐東風入畫船

華堂高敞聚羣仙此處陰晴得景先夜玩虛明千
頃月曉看蒼翠萬山煙笙歌聲沸春波上鐘磬音
傳夕照邊欲約詩朋同載酒闌前來泊總宜船

三賢祠

在蘇公隄第三橋下白文公林和靖蘇文
忠公祠舊在竹閣乾道間移建水仙廟嘉

定十五年郡守改建於此三軒扁曰水西
雲北日月香水影曰晴光雨色就三賢西

湖詩摘出

東坡政績踵香山梅下韜光獨養閒一樣清風無異
代三公遺像有生顏竹亭畫鶴銜芝老石鼎蟠蛛炷
柏慳摘取吟聯分扁隸英遊時駕碧雲還

三賢祠屋對南山異代同居廟貌闕前守再成新
棟宇後人猶想古容顏由來蘇白才名盛頗覺林
公吟思慳不忘西湖舊風月飈輪鶴馭共來還

雪江講堂

西湖百詠卷下

六

在蘇公隄三賢祠堂北婺州布衣胡恍渚
祐中充三賢講堂堂長結屋居焉自號雪

江選羣公錦囊集

索居占得藕花風幾字頭銜迥不同烏帽染紗裁一
幅錦囊分卷集羣公湖光長日侵皋座竹籜多時積
鶴籠繫柳吟驢何處去想應乘雪釣江空

軒窗涼引芰荷風襟韻超然孰與同湖曲泛舟如
賀老籬邊採菊效陶公金魚供玩何曾釣白鶴隨
行不用籠今日雪江空有號詩編寂寞錦囊空

崇真道堂

在蘇公隄第四橋下水仙廟北咸淳中
重建納三清雲水集仙閣擁壁甚工緻齋
厨豐腆蜀中道人主之

蹢躅鶴聚水雲中雲水相逢色色空講道無人知畏
壘集仙有閣想崆峒柳隄風日齋鐘散蒲座塵埃食
鉢充一老雙了離蜀久西窗掩定讀參同

陰陰竹樹列庭中門外層巒倚碧空但願羽流來
福地底須鶴馭向崆峒重修眞館香燈盛廣接雲
遊供饌充至自青城老仙客闡揚玄教孰能同

小新隄

西湖百詠卷下

九

在蘇公隄北山第二橋西淳祐二年郡守
新築直至麴院船步水接桃溪寺前澗通

靈隱天竺

添築湖隄種柳條行春路截九松腰直看西日歸三
竺平接南山第五橋麴院岸通沙澗淺桃溪寺接石
津遙遊人從此言旋便不受回舟著相招

綠柳垂垂千萬條輕盈瘦似沈郎腰小隄新築通
靈隱芳草平鋪接畫橋歸寺老僧猶覺便出城遊
客不爲遙東風何處堪沽酒看取青旗隔岸招

翠芳園

在南屏山東舊爲屏山園開慶初內司展
建東至希夷菴直抵雷峯山下水地西至
南新路口水環五花亭外御舟名蘭棧有
海查一樹開小紅花移根良難獨存園門
外尋亦枯矣咸淳間建宗陽宮移拆入城
翠抱南山樹石蒼五花亭外萬花芳雲芝拱斗晴簷
溼金字屏風水榭涼柳接蘇隄無空地萍侵蘭棧有
深坊未幾移築仙宮邃一本紅查委路傍

地接屏山山色蒼海查一樹尙芬芳百花爛熳春
光好萬竹陰深暑月涼細草近連仙客館垂楊低

西湖百詠卷下

十

覆御船坊年來此境荒蕪甚遺老經過歎道傍

甘園

在淨慈寺相對齋宮之西舊爲甘內侍園
淳祐中名湖曲園咸淳中屬謝府名新園
園倚雷峯有四面堂淳祐郡守所剏堂下
接翠芳園船坊

內宮園邃傍齋宮楊柳隄南翠幾重四面堂虛凌上
界五層塔近壓中峯徑連湖水行幽草廊接風亭臥
偃松隣岸御舟空望幸深坊長日鎖飛龍

甘氏名園近舊宮東風花綻路重重聲鏘環珮風

前竹翠結芙蓉雨後峯池內已無魚躍藻塔邊猶
有鶴巢松當年中貴今安在應向橋山從六龍

雷峯

在顯巖院開寶中錢氏妃建塔院側有
雷峯菴郡人雷就故居塔記始以千尺十
三層爲率事力未充姑營七級此山出黃
皮木世傳衆山環遶故名中峯林和靖有
中峯行樂詩慶元元年菴院始合爲一今
止五級或因風水相壓減去今地基廣袤
塔身矮肥往往圖畫者欲着相不能不疑

西湖百詠卷下

五

此地名塔術

五級浮屠透次寥黃皮園上梵坊遙當時雷就家曾
棄前代皇妃迹已銷鈴帶水風傳古術燈分山月照
長橋根基自廣雲層滅擁腫難供畫筆描

古塔湖邊久寂寥碑刊歲月亦云遙風來金鐸何
曾響雨剝青紅已盡銷畫見簷陰飛野鷓夜無燈
影落溪橋畫師欲寫西湖景此境應須用意描

勝境園

在雷峯路口東開禧間韓侂胄園陸放翁
作南園記韓遊村莊曰惜無犬吠隨有效

之者韓敗園屬官名慶樂園涪祐中撥賜
嗣榮王易今名

名花嫋嫋草纖纖臺榭隨幽邃勝添十樣結亭環水
樹一碑述記臥雲簷梅關橋落停屨鑰射圃樓空失
採簾向日相傳誰學吠村莊畢竟出沽帘

春來芳草綠纖纖亭榭園中比舊添芍藥日烘迷
綵檻芭蕉風動拂雕簷花邊碧沼堪垂釣竹外青
山稱捲簾誤國平章何處也東風還颺酒家帘

長橋

在勝景園東在昔此橋跨水甚長橋亭且

西湖百詠卷下

三

壯麗日填月塞皆民居矣橋西有寺南對
鳳凰山又有澄水閘東抵清波門湖橋此

山橋亦最短而長名自若

南港虛明架石梁寺樓鐘落幾斜陽相傳亭跨危基
壯誰想橋橫古道長澄水閘荒沙草碧清波門近市
塵黃鳳凰山在闌干外玉抹煙屏鷺一行

前朝疊石架爲梁影落清波幾夕陽世事如今雖
已改橋名依舊尙稱長岸頭雨過山逾碧闌畔秋
深柳半黃曾策吟筇閒倚處汀州飛起雁行行

劉妃墓

在方家峪鳳凰山下褻親崇壽院後紹興
中思陵敕葬妃子於此

佛廬增耀石人眠莫謂思陵雨露偏
籠斷自空蝴蝶
夢魂歸猶咽鳳凰泉碑趺蝕翠埋荒
土樓栱塗丹落
廢磚主祭有誰今若此此時出色想
無瓊

煙草萋迷石獸眠生前應沐寵恩偏
芳魂寂寂依
何處幽魄沈沈闕夜泉水鳥競巢神
路柏雨苔深
翳饗堂磚一坏誰奠清明酒只有楊
花鋪白氈

慈雲嶺

在方家峪西南嶺下爲郊臺嶺頂可望江

西湖百詠卷下

三

湖石上刻後唐篆字云梁單闕之歲
興建
龍山至沼灘之歲開慈雲嶺至今尙存

疊疊流雲步步苔九霄紫氣限蓬萊
後唐刻石初開
路南宋郊天別築臺慰眼江湖空歲月
傷心陵寢墮
塵埃桃花爭趁春風老又引遊人一度
來

行躋石磴躡春苔南宋遺基但草萊開
路尙存前
代碣拜郊還有舊遊臺東瞻巨海茫茫
浪北望中原
滾滾埃最是令人凝睇久胥濤遙駕雪
山來

包家山

在慈雲嶺南冷水峪多桃花名桃花關

門上揭蒸霞二字拜郊臺山之西藉田園
在山之南

綺霞蒸日透林梢一族南山尙姓包冷水峪邊苔色
老冲雲樓下樹陰高園隣古道傳耕籍臺倚青城想
拜郊欲趁桃花尋隱去關門無鑰不須敲
桃花滿眼錦攢梢春色疑將山色包爛漫正憐千
樹合岩堯還露一峯高詩人着屐閒躋嶺遊客看
花競出郊亦有招提在煙谷數聲清磬隔雲敲

登雲臺

在天眞院山上後梁龍德中錢氏建臺名
西湖百詠卷下

三

登雲又名錢氏郊臺臺側有靈化洞錢武
肅就石刻碑

吳越山川幾落暉登臨轉步入雲屏寺名曾後天眞
錫碑字空傳武肅揮靈洞土埋攢棘掩古臺石落借
松圍龍旂鸞輅曾遮擁有祀園丘慶六飛

古苔衰草幾斜暉臺下人家白板扉舊刻已看蒼
蘚沒新詩聊把彩毫揮迢迢颺馭三山去寂寂雲
山四面圍來此登臨慨吳越歸鴉還帶夕陽飛

五丈觀音

在勝林院內唐開成中建錢氏時有西竺

僧轉智附海船歸風鳴浪湧智誦如意輪
咒見如意珠王相高十丈風息得濟智謀
高梁以答佛施建炎兵燬止存五丈觀音
諺傳人有意度則云轉智者以此也乾道
中光堯聖子神孫臨幸有程泌記
海國風濤擁萬尋此身何翅直千金涉波直現昂藏
相結屋還堅報施心圓得諸方傳轉智幸存一半有
觀音陰廊誰立苔碑在只載三朝法駕臨

大士空中現幾尋莊嚴甯惜費千金若非突兀驚
人相那顯慈悲救苦心風度遙傳鐘磬響月明還

西湖百詠卷下

五

聽海潮音殘碑尙在荒山裏鳳駕鸞旂不載臨

表忠觀

在龍山南熙甯中趙清獻公奏請以錢氏
墳廟於此建觀俾諸生爲道士曰自然者
居之歲度其徒賜表忠詳載東坡所撰碑
紹興至寶祐前後屢增葺咸淳中觀廟合

爲一

錢子欣然着羽衣何須學賦鑑湖詩帝俞清獻垂情
疏人讀文忠敘事碑五廟衮圭榮祖節千年香火托
孫枝雲林閣上西風起吹落龍山宰樹悲

曾聞大樹錦爲衣惆悵如今爲賦詩鐵券千年吳
越裔記文百世長公碑香燈寂寞存遺址松柏荒
涼滅舊枝惟有年年春色暮啼鵑空向月中悲

聚景園

在清波門外阜陵致養北宮拓圃西湖之
東斥浮屠之廬九曾經四朝臨幸繼以諫
官陳言出郊之令遂絕園今荒圯惟柳浪
橋花光亭存

鑿鈴遺響輦遺蹤萬景曾經聚此中寺宇有名基址
散君王無逸讎遊空橋昏柳浪龍舟雨亭冷花光雉

西湖百詠卷下

五

扇風臺沼已無春又老萬年枝上夕陽紅

聚景依稀有舊蹤阜陵曾養此園中花光柳浪名
還在鳳輦霓旌事已空金井梧桐愁夜雨碧闌芍
藥怨春風如今倚杖聞回首霜葉離離映水紅

崔府君廟

在顯應觀內東漢崔子玉也傳爲磁州府

君紹興中建靖康間思陵使至磁州神馬
引而南建炎初秀王夫人夢府君擁一羊

曰以此爲識遂毓阜陵嘉定間樓鑰奉詔
撰碑述神靈甚詳且謂史失其名非崔子

玉也

靈休遠被衛行都陰有元勳夢又符引馬擁羊昭景
貺立碑建廟述嘉謨九陵荆棘年空往十里笙歌景
不殊莫倚西齋闌檻去斜陽無語滿錢湖

東漢明神護宋都深宮曾有夢相符試看歿後昭
靈貺定是生前著顯謨金石文章千古在江山景
物四時殊忽聞闌外鳴簫鼓畫舫何人去泛湖

依光堂

在崇福寺內太平興國元年建寺本錢氏

故苑芝生其間遂建寺號靈芝大中祥符

西湖百詠卷下

三七

賜崇福額紹興中阜陵臨幸御小車至齋
堂飯僧面湖創堂扁曰依光中設御座

塵凝黼座憶垂衣今日湖波錦四圍靈毓紫芝三秀
遠光開綠玉片金輝松窗自掩空蓮社石榻相朝臥
柳枝半捲珠簾看落景鼓簫長送畫船歸

禪老身披舊衲衣寺前山色翠成圍只因曾沐君
王幸從此長依日月輝苑內舊生三秀草堂前春
長萬年枝鬢輿一去無消息唯見煙林夕鳥歸

西湖百詠卷下終

右宋董嗣杲西湖百詠及明陳贄和詩二卷傳刊本於陸篠猷飛陸則借於黃小松易蓋廣仁義學藏書也元本楮墨極古而無刊刻年月可考按西湖志云餘姚陳贄卽嗣杲元題依韻廣和凡九十六首與嗣杲詩併刻天順癸未南康知府錢唐陳敏政爲之序又載嘉靖丁酉周藩南陵玉雲樓子重刊序云董倡居前陳和居後景凡九十六詩共一百九十二謂之百詠者蓋亦極言之耳今此本首卷四十九題次卷五十一題共詩二百首是天順嘉靖二刻俱非足本此當是天順癸未以前所刊在當時已稱難覲矣惜

西湖百詠跋

一

多訛舛版復滲漫雖就志乘及選家所錄稍加訂正然闕疑處尙多也又按志以嗣杲爲錢唐道士及觀卷首咸淳壬申自序有薄宦於雪公事簡輒是正完之語則知撰詩時董方筮仕其爲黃冠師或在宋亡之後有託而逃殆南宋之逸民不當僅以方外目之也嗣杲字明德號靜傳後入道孤山四聖觀改名思學字無益見周公謹絕妙好詞陳贄字惟成官太常少卿其行事俟再考云乾隆乙酉十月二日積雨晚晴得閒居士鮑廷博識於蘆渚之借一軒

舊刻標題云和西湖百詠詩雖分卷爲兩而無卷上

卷下字又和詩原作俱平寫錄竟頗於意有未慊因重鈔此本稍更易之并補編目錄以便檢閱是歲臘月十有三日覆勘畢又識

再按西湖志所載周藩重刻序陳惟成是英宗時人則所謂天順癸未陳敏政爲序者自是原刻何以亦止九十六題今志中不錄敏政元序殆纂志時僅見周藩刊本遂據其序所云九十六題者著於錄而周藩翻雕時其底本或有脫頁當日亦未深考耳予所借黃氏藏本楮墨雖在嘉靖以前而脫誤紛如其非元刻甚明前跋所云天順癸未以前刊本究屬臆度

西湖百詠跋

二

終當覓元刻及周藩翻本對勘方釋此疑耳是月望後一日得閒居士再識

陳贄字維成自餘姚徙錢塘洪武間以薦授杭學訓導擢翰林待詔進博學命教內豎冲和坦易人咸親之官至太常少卿所著有自怡客屋諸詩藁

錢塘縣志

陳敏政字志行原籍湖州登宣德丁未進士卜居仁

和初授知縣歷陞南康知府政尙和易初授縣時聞

邑人多强悍人信之曰民未有不可化者及徙美邑

人質之則曰土自美吾無利也素不善事當路竟以

本官致仕南昌郡人奉主從祀於三賢祠

杭州府志

客杭日記

光緒辛巳孟春
錢唐丁氏蔡行

雍正乙巳春三月六日客揚州飲于程松門七芙蓉閣同會者爲里中友江硯南酒半松門兄子岷東出觀所藏元京口郭天錫先生日記真蹟其四冊行楷精妙奕奕有神中有至大戊申客杭一冊時燭邊醉眼觀之不甚記憶後十餘日耿耿于胸因亟從叟硯南借鈔硯南亦有同好卽往言之岷東岷東殊不祕也攜至子寓舍呼燈捉筆寫成草本略汰其無繫武林典要者細讀之則杭之耆舊大半皆在往還而坊陌橋道琳宮梵宇去宋不遠壯麗深嚴可見焉遊鳳凰山故宮一段載白塔以碑石爲基猶有進士題

客杭日記序

一

名金銅鐘一口上有淳熙改元曾純甫觀篆銘則他書俱未載此信乎百聞不如一見也寺壁題詩與程史所紀康伯可題徽廟御畫扇略有數字不同想是後人所改耳先生去今三百餘年偶然攢筆完好無恙而適遇子兩人皆杭人鈔而傳之似乎有待者若岷東不恡希世之藏公之于人使後之述風土者有所攷皆不可以不記也三月廿六日杭東城厲鶚

謝冰錄元京口蔣天錫先生日記真蹟其四冊行楷
閣同會者爲里中友江硯南酒半松門兄子岷東出
飛五丁月春三月六日客揚州飲于程松門七芙蓉

客杭日記

元 京口 郭昇 天錫

至大戊申九月初一日 燒壽星紙 拜親 路遇
雲谷顯舍人握手話去年此日在邳州道中時相
與一笑

初三日雨 陳和父來錄示新文 小窗兀坐誦滿
城風雨近重陽之句誰其慰予岑寂耶

初六日晴 李仲謙攜紙求書畫蘭 過五條街遇
陳景南同訪陳響林出示小米手軸臨伯時馬雪
林行虎三卷塔海公物也

客杭日記

一

初十日晴 登甘露寺見本長老留酒午麪仍求書
放翁水調歌孫楚望摸魚子二詞于多景樓下壁
上又以紙求書遺教經四十二章經瀉山警策證
道歌

十二日晴 爲甘露本無傳長老鈔經客有惠杭州
潘又新筆者書小楷數千而不伐可愛可愛

十四日晴 訪盛季高出示李重光墨竹雛鷓希遠
墨梅古木方仲明同茶

九月十六日晴 晚趁呂城夜航作錢唐之行

十七日午前抵呂城壩下倒換小舟至奔牛復換小

舟晡時至常州入城元豐橋見白湛淵提舉直出江陰未回乃子无咎无華留飲同白无咎到太平寺觀壁上畫水中作一筆繞之不斷立視久之若洶湧生動之意奇筆也

十八日晴同无咎回蔡德甫禮留小酌煮鱉蒸芋次别无咎昆仲登夜航之姑蘇有北客喧呼至二更乃睡

十九日午後抵平江見龔子敬山長父子留宿具晚飯飯已留燈夜話是夕多蚊

二十日晴飯罷登航解后杭人潘伯起呼酒酌之

客杭日記

二

蓋在大都時曾相識故也其上船行

廿一日晡時上長安買飯

以下仍錄全文

廿二日四更到杭州城外霜月滿天寒氣逼人候北關門接待寺鐘動換舟入城拂明潘伯起送予歇于施水坊橋梳頭沈待詔之樓遇金壇尹子源同寓橋東訪趙伯可儲叔儀打豬巷見李伯玉留茶話乃事次到江浙省中照磨所見李叔義

省西見張菊存下龔子敬書會張松澗府判到五房後見武臨清提舉會王一初周有道二都目李教授及武公合似口口教授歸寓所會吳茂

之房主人具酒小飲余亦續酒 同茂之到長生
老人橋見唐仲文新補廉吏不遇而還 過紀家
橋解庫門首見吳若遺提點

至大元年戊申九月廿三日客杭晴 早過井亭橋
解后張雲心州判 次遇湯北村同知張景芳學
正 到立同觀見吳若遺若遺有他事令師孫羅
康伯相接具早飯鄭表白同集栢窗鄭君之子也
飯已入壺中林壑次開北斗殿看李息齋所畫松
二株于壁間 是日郝左丞趙子昂方會而去欲
見子昂不果 見李伯玉改所幹之文約來日子

客杭日記

三

省中見其子 出北關門湖州市妙行寺中尋伏
維那已于昨日登天目山矣徒有悵快寺僧宗兄
供紙留數字而退觀正殿佛三尊偉甚中設毗盧
遮那佛像前殿止有藏一座次入法堂有碑石數
本云喻彌陀神筆所畫佛像傍刻本末不暇記也
次禮古觀音像相傳唐朝塑者兩邊畫壁以屋暗
不可細覽門有放生池俗云接待寺者卽此院也
回路足行倦甚坐小舟而還 唐仲文李叔義來
值出趙伯可來 寓樓頗潔便于坐卧大抵杭城
樓居相連自有一種風韻耳 婺州孔君立來聞

孔提舉新除晚見唐仲文外郎出示米老研山圖
路遇王成之都目相與立談久之又遇王壽之
九月廿四日晴 客杭 早到省中照磨所見李叔
義改抹元文 到儒學提舉司攜李兄書見王一
初都目投呈子會王壽之王子芳任伯和是日分
付該吏金君玉承行 次約金君玉毛令史市樓
小集 兩作 湖上兜率寺見趙子昂學士不遇
乃姪趙仲美具茶訖致意 是日遇牟學甫宗壽
卿徐君美袁義甫楊廷秀丹徒宣差狄仁卿田君
美蔡宣使許芳所 應旂

客杭日記

四

九月廿五日陰 客杭 早到省中見李叔義 次
入禮房見張德輝外郎話乃事 到提舉司催金
君玉書卷王一初未允 再到省中見李叔義託
見王公范成之主簿來 晚張德輝請說話會邱
中山教授德輝檢尋解由未見託爲挨問 見范
成之 尹子源約小飲是夜客樓暄甚必兩作也
廿六日陰 客杭 湯北村同其子君白來 張德
輝來 到省中 辛巳好晨聚會禮房見張德輝
德輝作書與王都目 見張菊存會衢州鄭子實
山長 到儒司不聚 結縛橋西前洋街回謁湯

北村同出訪張晴川次見崔進之回北村具酒午
麪免書數紙屏稍高彥敬古松一株可愛窗外矮
橘數樹結子無數壓枝欲折若吾鄉則無此也飲
散乃子君自由大街轉歸 張菊存來 晚見張
德輝吳茂之來值出 今日見北村說葛元白曹
梅南戴祖禹金子仁胡穆仲皆爲古人可惜再到
杭城愈覺舊遊之落落也 客樓暄甚衣襟流汗
借扇揮之

戊申九月廿七日陰 寓杭 早到省中見李叔義

次到儒司見周都目以官吏未允所請歸寓寫狀

客杭日記

五

再到省中見張德輝德輝約晚來說話是日於省
卷中檢尋學錄解由方見 晚晴登吳山下視杭
城烟瓦鱗鱗莫辨處所左顧西湖右俯浙江望故
宮蒼莽獨見白塔屹立耳次謁伍子胥廟轉至拱
北樓卽朝天門行大街官巷而歸 茅山書院山
長赤蓋象賢金壇教諭王竹所來茶罷同見趙伯
可 見張德輝改告省狀子會邱中山 趙伯可
儲叔儀來 吳茂之遣僕約來日早飯 尹子源
相過夜話 路遇程鵬舉

廿八日晴 客杭 鄉人胡君用來 赴吳茂之早

飯坐客余及運司宋外郎廣平人也 訪王成之
託見武公 訪湯北村 訪吾子行出所作無稽
集皆戲談也 立同觀見趙子昂時邨左丞坐正
席子昂問都下事 游開元宮舊楊駙馬宮也深
邃可愛正殿曰景命萬年之殿 見鄭鵬南簽事
留席坐客來僧錄事柯以善尹存菴劉耕莘又一
客及余共七人 晚見張德輝看省卷又作學錄
教諭擬倒矣託其宛轉未知可行否免人幹事不
料其相誤也 湯君白來值出 回謁赤盞象賢
不遇

客杭日記

六

廿九日客杭晴 早到省中見張德輝李叔義 訪
王成之不遇 訪柯以善 再到省中禮房爲立
擬劄事 到儒司司官不出獨吏輩兀坐司房而
已 訪張景芳學正 訪張竹村書院觀諸公詩
牌 湯君白來同游明慶寺看新塑佛像 次入
廣化院 次游仙林寺寺中無可觀者相近一術
士之女談星說命若懸水然 次與君白午飯君
白具茶茶已自觀橋行至官巷而歸 吳若遺送
魚麪果盤來 晚持魚果見德輝 朱良齋山長
來 是日趙伯可歸湖溪就付景明書

三十日陰客杭 早到省中禮房見張德輝李叔義
是日改正擬劄 次訪朱敬齋湯北村遣乃子同

李兄來求字 到儒司見二都目催申狀會王成
之同君白出遊宗陽宮時裝塑未就 次遊新宮
佑聖觀看擁壁二十四堵皆新畫也 路遇胡石

塘主簿 煎魚沽酒會尹子源沈六郎 晚見德

輝約來日到省中計會選本 晚雨喧甚 夜雨

生寒 大德十一年二月十七日禮房呈前鎮江路
儒學錄郭昇給由稟奉省堂鈞旨連送選

房于學正山
長內任用者

至大元年戊申十月初一日雨 客杭城施水坊橋

客杭日記

七

東岸沈氏樓 早冒雨到省中次見張德輝 雨

中悶坐朱敬齋山長邀至其家具小酌午麪麪已

雨止 路遇莫知事蔣文甫

初二日雨終日 客杭 到省中付文書與選房以

未照元除又欲刁蹬張德輝宛轉言之 見李叔

義 到儒司大雨中止有武老兀坐廳上諸吏無

來者 湯君白李君德來算範圍數次同到官巷

問茶茶已訪周君遠道士次到君德家出子固墨

戲閑看看已分路各歸 晚尹子源招飲沈六郎

同集 子源爲財賦府吏求書

初三日又雨 客杭 到省中見李叔義 伺候也
先伯提控不出 到儒司二都目不出 同尹子
源見儲叔儀留小酌次同叔儀到子源寓樓開尊
薦亥首 同子源到大街問茶 次見沈誠之看
翠雲子 次見唐仲文不遇 湯君白來 是日
儒司緩慢吾事略發數語使之聞之 晚遇金君
玉云王都目書卷矣 德清吳菊泉相過夜話子
源同問茶吳公至元廿七年赴北寫金字經者
省東藥鋪遇張君遠

初四日乍晴

到儒司坐整日方得解子

解后陳

客杭日記

八

無逸昆仲

牟學甫吳茂之來值出

訪范成之

李君德湯君白攜命書來

燒玄壇紙

宗壽

卿來言來日有人歸鎮江付家書

晚見張德輝

付申狀

初五日陰

飯後到省中禮房同張德輝見馬外郎

楊典付申狀

午同小王覓舟到北新橋覓方仲

明不見空費船錢壹貫貳百五十大雨作只得急

回 晚見德輝于省前

到龍舌頭西去漾沙坑

見馬從簡

敬

外郎言乃事未允所請

回見德輝

云來日當爲著語卻不必出也付後司使用 吳

菊泉見過夜話 省中遇賈州判

初六日雨不可出 寓杭 吳菊泉攜紙二幅求書

吏別歸德清付陳有之教諭記事 見湯北村

次見張晴川 見趙子昂不遇見趙仲時見陳無

逸不遇乃弟陳正一相接 湯君白來同出見李

君德留茶 訪羅康伯不遇 晚見張德輝 儲

叔儀隔河樓上見呼出紙索書具酒晚飯

初七日雨 客杭 到省中見張李二兄 李君德

湯君白來攜紙索書就送紙一幅訪吾子行求篆

字閑話久之惠印色方 路遇胡石塘儲叔儀相

客杭日記

九

招五盃午麪坐客焦君用尹子源余及陳外郎主

人飯罷焦公買紙求書 晚見張德輝令來日見

馬公 路遇范君用

至大元年十月初八日雨 客杭 早拂曉伺候馬

外郎來從所請其意已諾之矣 見張德輝于省

中 遊淨慈寺禮佛看羅漢五百尊 訪朱敬齋

次見廉司書

吏趙潤卿汴梁人也會湖州路吏韋其之回路德

輝待羊飯 訪莫知事路遇聶通父兵房 邱山

中教授來

初九日喜晴 客杭 早見鄭鵬南廉訪 次會柯
以善以善留三酌劉悅心張景芳寫篆字邱秀才
續至邱杭人吾子行之高弟也 到省中是日眾
官爲別不花平章送路不聚 訪吾子行不遇
訪湯北村亦出 訪張晴川于崔進之家 訪張
德輝 儲叔儀以今日登舟還義興相呼午飯出
紙求字會焦君用 路遇井同知蓋爲后降香作
使來杭 盛親家章端甫自鄉中來寄至家書拉
同市樓小酌大街問茶燈下自官巷歸分路 尹
子源請薦海蜃話至二鼓

客杭日記

十

初十日陰 早見鄭鵬南廉訪 見柯以善 到省
中 盛親家見借鈔一笏以今日歸不及作別
張仲美湯北村來值出 李君德湯君白來求書
鄉人趙翔甫求字本 晚再到省中伺候吏輩
到新宮橋見井同知免于郭都事處著語 晚
方仲明尊舅來留宿

十一日又雨溼熱 早湯北村招早食坐客方仲明
宋與之父子 同方舅到省中見張德輝會新市
陳副使省前具茶 是日李叔毅著語馬外郎吏
房次同方舅見高國梁司丞 次同到下馬婆巷

見李君實新授宜興都目茶罷方舅拉往新門具
麪路遇宣州胡則大梅主簿汝說趙祥甫來晚

見馬公猶未慨然次見德輝急步而回汗流溼
衣幹事未成殊焦煩也

十二日 客杭 早到省中換劄子候押 朝天門

訪張雲心州判留坐具午酌薦糟鱓雞麪坐間雨
作取傘乃回 再到省中 路遇劉希聲 胡則

大來值出不及相會 晚雨大作張德輝送紙來
寫刷卷宗目至二更乃辦

十三日雨 客杭 到省中 趙翔甫送果子求字

客杭日記

十一

本 尹子源具午酌

十四日又雨 客杭 到省中 遣王二到湖州幹

事作趙文卿陳有之書 訪湯北村吾子行張景
芳 尹子源待午飯同出問茶 會温長卿金沙

入也 路遇王敬臣常州路司吏 見唐仲文不
遇 張景芳送紙求書吳興虛徹道人詩傷道人

費氏景芳之曾祖母云

至大元年戊申十月十五日 客杭城施水坊橋沈

六郎樓 雨作不可出 陳無逸教授來 朱敬

齋山長來 張德輝外郎來 尹子源呼酒過余

寓樓酌之德輝去後子源具午飯蓋遣王二之湖州客中乏僕故耳 李君德來 趙祥甫來

先妣憫忌日

十月十六日又雨 客杭 張雲心遣僕寄書來雨

中約相過彼此客況蕭索耳 吳若遺招午麪

到省中伺候吏輩 方仲明來雨中拉出見高國

梁說假借事 赴若遺之約坐客朱澄齋提領史

元輔道判 是日若遺他出令水邱養直相伴

訪王眉叟提點不遇 晚見德輝 次見馬生未

允所請 回再造德輝家 方仲明舅來留宿具

客杭日記

十一

晚酌待之子源同

十七日晴 客杭 早回方舅早飯 見張德輝晚

寫吏牘 方舅拉出見高國梁會李君實 路遇

王君澤邀茶君澤來日之鄉間托寄聲 王二自

湖州回 路遇賈景顥紀祥甫周謙甫 李伯玉

來 李君實來 榭樓尹子源得財賦府文書了

辨可喜予滯留日久所幹未就愈覺憂悶耳 遣

王二到省中問話 李君德湯君白來張德輝續

至 晚尹子源燒紙招夜飲坐客余及沈咸之沈

國寶沈六郎父子 夜與張公抄文字

十八日晴 客杭 早到開元宮見王眉叟提點不
遇徒弟徐雲谷相接會吳江張景亮州判謝退樂
府判景亮師道學士之長子也時問方蒜山禮任
事到省中本問乃事楊生云今晚可見馬公 聶
通甫拉入兵房出紙求書四幅會湖州韋共之
次見叔義德輝 到小堰門回謁張仲美知事不
遇遇王師善之姪 是日遊大般若寺在鳳凰
山之左卽舊宮地也地勢高下不可辨其處所
次觀楊總統所建西番佛塔突兀二十餘丈下以
碑石贅之有先朝進士題名并故宮諸樣花石亦

客杭日記

三

有鐫刻龍鳳者皆亂砌在地山峻風寒不欲細看
而下 次遊萬壽尊勝塔寺亦楊其姓者所建正
殿佛皆西番形像赤體侍立雖用金裝無自然意
門立四青石柱鐫鑿盤龍甚精緻上猶有前朝銅
鐘一口上鑄淳熙改元曾觀篆字銘在皆故物也
行至左廊記得壁上一詩云玉輦成塵事已空惟
餘草木對春風蕙高□□□□目斷蒼梧夕照
中寺門俗云望江亭俯視錢唐江水大略與楊子
江同但隔岸越山蒼翠差勝耳遠見西興渡口烟
樹如薺 次遊新建報國寺行至殿後有塊石僅

留二十餘字僧爲別立一木牌云五十年前理宗
夢二老僧曰後二十年乞一住足地恍然夢覺今
築地得此石卻無年代可考昔梵剎爲王宮今茲
復爲梵剎如波入海以予觀之亦好事者爲之也
且朝代之廢興皆天也二僧入君王夢中孰記而
傳之耶浮屠之說妄矣傍有二客相與一笑而回
訪賈景顥不遇 張景芳來取詩卷去賈景顥
續至 晚見馬生 次見張德輝 遣小王下長
安盛親家處借錢 路遇宋春卿石剛中

至大戊申十月十九日晴 客杭城 早到省中見

客杭日記

西

楊典 三橋早飯飯已見吾子行寫篆字相送仍
取玉簫爲子吹數闋子行隱居不仕時能道滑稽
語亦近來罕有 同李君德訪崔進之索小楷碑
文回路君德邀市飯 再到省中乃事小見次第
晚見宋春卿郎中索根腳抹子

二十日晴 客杭 早見宋春卿與根腳抹子 到

省中見馬公 登吳山城隍廟壁畫二鬼頗得回
立門首左顧西湖右視大江杭郡人家皆在足下

次遊玄妙觀門立徽宗御書碑石殿前立高宗
御書道德經石刻經幢二亭覆之後有真武觀記

開平二年物也有老道士云吳越時已有之昔爲
紫極宮惜前朝碑石有天慶觀字皆鑿去不存殊
失古意且朝代更改勅額曰玄妙當存其已往而
新其方來可也道士俗物大敗人意回到省中石
路高下足力少倦 湯秋岩通判來約尹子源同
到旗亭沽酒酌之 湯君白引張伯愚來攜扇十
柄求書 李君德後至 張菊存來 是日本司
文書有好音爲張士瞻者阻之令人敗興 乙巳日
廿一日晴 客杭 尹子源辭歸金壇 到省中未

見書卷次第而歸 湯秋巖來邀飲紅酒次送秋

客杭日記

五

巖至蘭陵坊分路 張景芳送照元除劄子來路

遇陳如心教授 開元宮見王眉叟會張景亮及

二羽客 訪宋春卿郎中會臧魯山廉訪秦彥立

外郎 名植 省中選房之本把也 方仲明寄紙求

書畫情緒不佳更遲一二日下筆 燒立壇香囑

告乃事 省中遇李君實王儀之

廿二日晴 客杭 到省中馬生以張郎中未允所

請故爲託辭會夾谷郎中送照元除劄子下架閣

庫雷毅夫收 見李叔義 胡則大來 湯君白

來回到府學見李霽峯教授 次見張晴川 次

見湯北村會韓竹間 路遇毛海雲山長 孫周
卿來同僉公之姪也 路遇王仲可 晚香

廿三日晴霧 客杭 省中假日 早冒霧到馬婆

巷見李君實託馬惟良見張士瞻說話 次到省

中見楊典 見謝暉照會 到寶祐坊佑聖觀橋

西回謁胡則大不遇 張景芳來 鄉人盛壽一

官人相遇爲高子西在此子西病瘡同見湯北村

問藥不遇回路盛兄邀小酌 湯北村胡則大張

景芳來 晚盛壽一哥約飲于欽善坊

戊申十月二十四日陰 客杭 早到省中 次到

客杭日記 去

儒司見金君玉問白无咎禮任月日湯北村費謙

夫來費公鄉人也年六十三 再到省中架閣庫

見雷毅夫爲照元除事 是日解后郭千戶夾谷

舍人王仲可相拉到天朝門酒家午飲坐客大名

人三都目皆軍中掌案牘者獨程其姓者通文

湯君白來燈下同到官巷問茶 再到省中囑楊

典

廿五日晴 客杭 早到省中解后孔良甫楊廷秀

胡宗伊李景仁 再到省中架閣庫 訪宋春卿

不遇 訪湯君白借典章幹事未就而回遇蘇滄

齋杭之善醫者也約市肆小飲 回謁王仲可不
遇 路遇田管勾今爲泉府院令吏在都下時曾
同寓云

廿六日 客杭 早重霧中見唐仲文不遇爲長興
欠俸囑呈文催討 次見宋春卿會江陰李外郎
春卿出紙四幅求書 盛親家公自長安來同西
盛壽一哥及二鄉人相訪 到省見馬生催促之
到架閣庫送吳令史使用紙錢見李叔義 訪王
眉叟盛親家約到芳潤橋午麪壽一哥同集 晚
又到省中囑馬楊二生 李君實來取字去報馬
惟良已見張士瞻說訖商量甘結 晚見德輝不
遇 夜香

客杭日記

七

廿七日 客杭 到省中伺候書卷已完馬生改抹
但咨省而已令人恨 再囑馬生不允 見張德
輝 盛親家來別付家書報事體如是 晚見馬
庄云非不用力首領官不從奈何欲退元物不曾
收 再見德輝見湯君白同見李君德借錢 歸
家悶甚奔走兩月今日壞盡

廿八日 早見唐仲文囑捧事 次見宋春卿會李
士可同二公遊開元宮次到寓所共茶二公更欲

相攜余以事不如意舍之而別 李君德來 問
卜再到省中見楊生令稍遲一 二日 見張德輝
論乃事 見賈景顥不遇訪郭總管不遇會李齊
賢 又見德輝值出 晚燈下坐久謀之無計更
遲二日且往長興索奉作歸計耳

廿九日霧中早見唐仲文不遇 到張德輝家 到
西倉橋見方仲明 到省中別李叔義 張晴川
來值出 晚作家書發王二來日歸

三十日晴冷 王二歸鎮江 出別張晴川崔進之
柯以善吾子行 湯君白知余事不如意呼舟過

客杭日記

六

湖閑行散悶遊南山惠因華嚴寺次遊開化院次
遊石屋洞俯視洞口深暗不可測覺陰風逼人壁
上記姓名而回 入勝果尼寺與石壁相對君白
令親惟德母子爲尼延坐設茗罷次游水樂洞扣
寺門久之乃得入遶寺皆奇石門有亭扁曰聲在
寺後 泉滴洞中相應鏗然有聲故名亭有石刻
坡翁東陽水樂寺詩觀畢而下踏石上黃葉攀徑
邊古松山林間自有一種清氣借筆題云至大元
年十月三十日京口郭天錫同湯君白來此聽泉
寺僧具茶飲之清甘卽此水也更過一二僧寺以

心緒不佳不及詳記泛湖而還西北風起同君白
錢唐門小酌分路 見張德輝 路遇黃明叔

至大元年戊申十一月初一日 辭吳若遺不遇會

王介叔朱提領 李君德湯君白來同出到君白
家具茶路遇鄉人孟子長 晚別張德輝德輝具
酒會邱中山杜器之宋□□李仲雍歸已盡醉

初二日晴 客杭 到省中領文書取回甘結 同

孟子長見胡則大值已回宣城路遇鄭君祥宣使
同茶 同子長見吾子行就別 次別湯北村

晚見馬生了絕乃事 晚邀子長小酌囑照元除

客杭日記

九

事 別李叔義

初三日早 別張德輝 同沈六郎買人事 午覓

小舟至壩頭下至西會橋見方仲明留小酌晚飯
就宿於其寓

初四日晴 離杭州 早方仲明待早飯飯罷遣丁

提控福童般行李上航船遇杭人魏提領褚太醫
同載 唐涇晚飯 夜行

附載

至大戊申十一月十五日 客長興 訪欽察公出

宣和御府黃居寀雪雀圖用雙幅絹畫角上添金

龍長可六七寸圍葫蘆御書并內府圖書二印雪
樹數株凍雀上下復作二鵲鴿真奇物也

十一月廿四日己卯陳元善來約文卿及子到其家
觀蘇漢臣孩兒四軸具酒三酌

三十日冬至節客長興同沈孤峰陳監鎮袁正
年甫盧希言沈希古賀呂知州三酌諸公去後呂侯
獨留予看許道寧溪山漁樂圖上用宣和殿寶後
有伯幾仲賓子昂三公題李君草物也

閏十一月十三日客長興訪孟雲心出示黃居

采萱草湖石螭貓二軸蔡月卿物也黃氏父子作

客杭日記

三

石用筆橫拖小作圈子俗謂之野鵲翅

至大元年戊申閏十一月十五日五更束裝賦歸早

離長興午過呂山下松竹蒼翠前一橋曰甫里橋

人言是陸天隨隱處詩家醞藉猶可想像也

至大二年己酉三月初十日趙伯可相約早飯飯已

三發書請伏虎林首座引領作焦山之行虎林間呼

卽至是日春色佳麗江靜無風到山見謙選中維

那次入方丈見尊無能長老留茶茶已領入具酒

煮麪坐者予及趙伯可二僧司官伏首座登山之

頂看塔展目眺望次憩于飛仙亭回見雅淡雲首

座選中煎魚具酒小集酒盡伯可先睡度不可回
先遣諸僕渡江晚陪尊長老虎林淡雲到海門邊
看日落一瞬萬頃金波蕩搖可謂奇觀散步而回
尊老既別仍送酒果到淡雲房小酌次拉虎林選
中踏月上羅漢巖訪福東濟禪房佛燈熒然爐香
未過具茗果閒話俯視棲鶻危巢皆在窗下與二
僧月下聽江聲倚樹清論久之洗城市之塵俗
也夜宿選中房虎林共榻

鶻按天錫有詩云揚子江頭風浪平焦山寺裏
晚鐘鳴爐香未斷燈花落喚起山僧看月明妙
甚卽此
時作也

客杭日記

三

郭髯行記篋中收便是滄江虹月舟解道樓居好風
韻杭人不合異鄉遊

題郭雲山日記真蹟一絕句樊榭山民厲鶚
書時雍正三年四月六日

客杭日記刻成小詩代跋

多情合遣到杭州錦字私箋客裏愁卻羨雨窗饒樂
事一尊相喚隔河樓

樊榭風流嬾往賢雲山墨妙手親傳錦囊湘篋同珍

重記取從今五百年

予傳樊榭先生
手鈔本開雕

尊前歡賞惜匆匆彈指誰留石火踪

謂七芙蓉閣
燕集諸先輩展

放烟雲重過眼可堪還問七芙蓉

事詳
屬序

玉躑金題走蠹魚都來有願米顛如巾箱乞與新聞

本津逮人人足祕書

得閒居士鮑廷博題時乾隆壬辰六月朔日

虎林烟瓦屋鱗鱗客裏光陰只四句但說樓居風韻

好夜來聽雨卻愁人

十日都來五日陰湖山勝槩亦登臨金鐘白塔前朝

話別有詩情無限深

小劫人間五百年坊橋寺觀半灰烟往時耆舊風流

盡并藉珠囊一列傳

客杭日記

三

徵君

樊榭

畢世事蒐羅帳篋如斯苦不多未許清言

獨珍祕郭髯其奈鮑髯何

詩眼有錢唐魏之絜同作

十日霜寒五日雪臨山雜槩亦登臨金鐘白塔前朝

積雪來難耐愁人

東林樹近望瀾瀾客裏光陰只四句但說樓居風韻

再問報士曠長謝履和掉劉王翁六月朔日

本津逮人人足祕書

玉躑金題走蠹魚都來有願米顛如巾箱乞與新聞

客杭日記

客杭日記鮑以文以厲徵君刪本刻入知不足齋叢書光緒戊寅夏購得塘栖勞氏舊藏雲山日記實從眞蹟摹出者今自至大元年九月二十二日到杭至十一月初四日離杭記事皆依眞蹟前後所記仍從厲本他日兩刻竝傳亦武林佳話也郭天錫文集久佚俞希魯序稱其先世洺水宋靖康避地京口高曾大父四世相傳終鮮兄弟祖母禱于神而生故名畀而字天錫晚年號思退以自抑卒年財五十有六顧俠君元詩選則又稱其一字佑之號北山嘗爲宣府判官美鬚髯人呼爲郭髯畫學米南宮嘗師事高房

客杭日記跋

一

山得其筆法與倪元鎮交最久道光閒吾杭振綺堂汪氏舉清尊吟社有分題武林古蹟黃蘗泉士珣分得施水坊橋郭金山寓樓云東岸橋尋施水坊樓居風韻說吾杭便於坐臥偏宜客況有親隣迭舉觴舊友重來歎寥落一官本分費商量羨他待詔能爲主至竟名傳沈六郎此詩妙絕足當跋尾矣又元詩選天錫題唐摹蘭亭墨蹟詩序云至元癸巳獲於楊左轄都尉家傳是尙方資送物是年二月甲午重裝於錢唐甘泉坊僦居快雪齋案甘泉坊今在駐防營中與施水坊相接至元癸巳則前於至大元年十有四

載可見天錫前後客杭皆僦居斯地意當時必有日
記流傳惜無從訪梓與此璧合耳辛巳九月二十二
日爲 先君子冥忌祭畢闕此牽連書之鮮民丁丙

客杭日記跋

二

07187

日錄 卷十 定 恩 錄 畢 闕 此 牽 連 書 之
通 商 原 天 錫 前 後 客 杭 皆 僦 居 斯 地 意 當 時 必 有 日
記 流 傳 惜 無 從 訪 梓 與 此 璧 合 耳 辛 巳 九 月 二 十 二
日 爲 先 君 子 冥 忌 祭 畢 闕 此 牽 連 書 之 鮮 民 丁 丙



